

石林春秋傳

十六之  
二十終

三百

漢書門類			
二〇六三	架	函	號
一三九	架	函	號
五八五	架	函	號

內閣文庫			
三〇六三	架	函	號
一三九	架	函	號
五八五	架	函	號

內閣文庫			
番號	漢	2063	
冊數	395 (308)		
函號	369	108	



A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale




© Kodak, 2007 TM: Kodak



石林先生春秋傳卷第十六

葉氏

淺草文庫



夏四月襄公二十不從乃不郊鄭公孫舍之帥師侵宋

公孫舍之鄭大夫之三命者也

公會晉侯宋公衛侯曹伯齊世子光莒子邾子滕子

薛伯杞伯小邾子伐鄭秋七月己未同盟于京城北

京城左氏作亳公羊穀梁作京當從二傳京鄭邑

大叔所封也鄭懼而行成則地京城者鄭亦與盟

也

公至自伐鄭楚子鄭伯伐宋公會晉侯宋公衛侯曹

伯齊世子光莒子邾子滕子薛伯杞伯小邾子伐鄭  
會于蕭魚

伐未有言會者此何以言會貴之也鄭人患晉楚  
之故諸大夫欲從晉曰何為而使晉師致死於我  
楚弗敢敵而後可固與也乃謀伐宋諸侯遂伐鄭  
而為京城北之盟矣已而楚復來伐鄭伯從之諸  
侯悉師再伐鄭鄭人乃使良霄如楚告將服于晉  
曰孤以社稷之故不能懷君君若能以玉帛綏晉  
不然則武震以威攝之孤之願也乃行成於晉晉於  
是申京城之言以成其本意約信命事而不盟赦  
鄭囚納斥埃禁侵掠使告於諸侯君子以是貴之

也葉子曰吾何以知春秋貴蕭魚之會歟鄭介於  
二大國之間為弱國自楚與晉爭強鄭無不與事  
晉則楚伐事楚則晉伐晉討其從楚則是矣而晉  
不足恃也戲之盟士弱為之辭曰鄭國不唯晉命  
是聽有異志者有如此盟公子騏趨而改之曰鄭  
國不唯有禮與強可以庇民者是從而敢有異志  
者亦如之晉不能奪也故自虎牢之役至雞澤而  
鄭受盟僖公從於晉者六年至邢丘之會而復叛  
自是三年之間我之伐者三楚之伐者一晉楚之  
爭鄭無甚於此時也君子其亦閔鄭之無以固其  
國也歟及是鄭人擇所從而終以服晉良霄之執

楚連三伐以討而鄭卒不從申之會雖諸侯皆在而晉不爭知其不得已也楚自是亦不復加兵而鄭之息肩者五十餘年則蕭魚之為已故曰蕭魚之服鄭也大矣此君子所以貴也

公至自會

會而後伐故以會致

楚人執鄭行人良霄

良霄鄭大夫之三命者也鄭以告服於晉而楚執之非伯討也故以人執

冬秦人伐晉

十有二年春王三月莒人伐我東鄙圍台季孫宿帥

師救台遂入鄆

鄆莒附庸之國也台在國內鄆在國外救台而遂入鄆非遂之善也季孫氏之強益甚矣

夏晉侯使士魴來聘秋九月吳子乘卒

吳前未有書卒者此何以書始能以赴通中國也吳自壽夢從諸侯會于戚而漸能從中國之習矣吳得以人見故至是復能以卒赴進之也不書葬辟其號也

冬楚公子貞帥師侵宋公如晉

十有三年春公至自晉夏取邾

邾附庸之國也

秋九月庚辰楚子審卒冬城防

防臧孫氏之邑也臣邑而國城之臧孫氏強也

十有四年春王正月季孫宿叔老會晉士匄齊人宋

人衛人鄭公孫薑曹人莒人邾人滕人杞人小

邾人會吳于向

叔老吾大夫之三命者也公孫薑鄭大夫之三命

者也此吳諸樊之會也何以殊會不使吳得主會

也吳告庸浦之敗故合諸侯以謀楚使舉上介曷

為以季孫宿叔老並會大夫強也

二月乙未朔日有食之夏四月叔孫豹會晉荀偃齊

人宋人衛北宮括鄭公孫薑曹人莒人邾人滕人薛

人杞人小邾人伐秦

荀偃晉大夫之三命者也

己未衛侯衎出奔齊

衛侯衎左氏穀梁以為衛侯公羊以為衛侯衎當

從公羊闕文也葉子曰衎之不名或曰此春秋之

義而非闕也孫林父甯殖既逐衎而立剽剽以公

孫得位非正故不以兩君之辭與之是不然春秋

諸侯以篡立而不得其正與強臣援之而立者非

獨剽也何嘗不以兩君之辭與之乎北燕伯欵出

奔齊以其多嬖寵而大夫之所逐也蔡侯朱出奔

楚以東國謀篡而蔡人逐之也則燕有君與東國

之竊其位蓋有甚於剽者而歛與朱皆名夫豈君  
 燕大夫之所立而與東國篡乎凡諸侯奔而名者  
 皆以別二君所以辨其正不正者不在是也惟衛  
 鄭奔不以名見蓋叔武不取於為君而攝之曹負  
 芻歸不以名見蓋子臧不取於為君而逃之則內  
 無君而不嫌爾今剽有國十有三年凡盟會征伐  
 之事春秋未嘗不書以衛侯及甯喜殺之正其名  
 曰弒君孰有如是而非君者吾故知其為闕文而  
 非義之所在也

莒人侵我東鄙秋楚公子貞帥師伐吳冬季孫宿會  
 晉士匄宋華閱衛孫林父鄭公孫薑莒人邾人于戚

華閱宋大夫之三命者也

十有五年春宋公使向戌來聘二月己亥及向戌盟  
 于劉劉夏逆王后于齊

劉夏王之上士也何以不言使王臣來我則言使  
 他國則不言使內外之辨也何以書過我也王臣  
 過我則皆書乎天子逆后以卿而公臨之劉夏上  
 士非正矣是故因其過我而正之也

夏齊侯伐我北鄙圍成公救成至遇  
 成仲孫氏之邑也臣邑而君救之非禮也救不目  
 至何以言至遇至遇猶至鄙也以公為畏齊故至  
 遇而止也

季孫宿叔孫豹帥師城成郛

前圍而公救之固過矣今季孫氏叔孫氏復各以其君而為之城著三臣之自為政也

秋八月丁巳日有食之邾人伐我南鄙冬十有一月癸亥晉侯周卒

十有六年春王正月葬晉悼公三月公會晉侯宋公衛侯鄭伯曹伯莒子邾子薛伯杞伯小邾子于溴梁戊寅大夫盟

前未有言大夫盟者此何以言大夫盟惡大夫之無君也溴梁之會齊高厚歌詩不類晉荀偃怒以諸侯為有異志使諸大夫盟高厚高厚逃歸於是

叔孫豹及偃宋向戌衛甯殖鄭公孫薑小邾之大夫盟曰同討不庭諸侯皆在是而大夫盟故不曰諸侯之大夫以大夫為無君也葉子曰自諸侯失正而大夫強至襄公而愈甚故盟會征伐三年之間諸侯不出而大夫出者四雞澤之會諸侯始復見時晉悼公之德猶未衰其將有以振之歟故自是至於蕭魚諸侯之見者九而大夫皆不與庶乎其稍正也及會吳于向魯以季孫宿叔老二卿並出而伐秦會戚再歲諸侯皆不出而大夫復三見明年晉悼公卒則大夫蓋復肆於悼公之末矣然而諸侯不出而大夫出猶云可也溴梁之會其君

在而大夫敢專盟則天下豈復有君哉雖曰荀偃之為而諸侯之大夫皆與有罪矣故春秋之惡大夫莫甚於溴梁

晉人執莒子邾子以歸

悼公始葬而平公出會莒邾雖以侵伐魯之罪當執然平公為無哀矣非伯討也故以人執

齊侯伐我北鄙夏公至自會五月甲子地震叔老會鄭伯晉荀偃衛甯殖宋人伐許秋齊侯伐我北鄙圍成大雩冬叔孫豹如晉

十有七年春王二月庚午邾子貜卒宋人伐陳夏衛石買帥師伐曹

石買衛大夫之三命者也

秋齊侯伐我北鄙圍桃高厚帥師伐我北鄙圍防

高厚齊大夫之三命者也

九月大雩宋華臣出奔陳

華臣宋大夫之三命者也

冬邾人伐我南鄙

十有八年春白狄來

白狄狄之別種也來者何來朝也何以不言來朝不能朝也古者夷狄在九州之外曰蕃國世一見於天子諸侯而朝夷狄非正也

夏晉人執衛行人石買



衛孫蒯淫獵於曹隧以重丘人之詢而使石買伐曹曹人愬於晉衛使石買如晉辭焉晉不能治孫蒯而罪石買之伐非伯討也故以人執

秋齊師伐我北鄙冬十月公會晉侯宋公衛侯鄭伯曹伯莒子邾子滕子薛伯杞伯小邾子同圍齊

圍未有言同者此何以言同圍齊惡靈公也諸侯不義靈公為溴梁之會共謀伐之於是前會之諸侯皆在而益以滕子晉平公禱于河曰齊環怙恃其險負其衆庶弃好背盟陵虐神主曾臣虜將帥諸侯以討焉齊侯禦諸平陰不勝脫歸諸侯遂及齊焚雍門及西郭南郭又焚東郭北郭古之言圍

者未必皆環之也曰禁之使不得出焉爾今十二國之師皆盡其力而齊之四面無不及焉是以謂之同也葉子曰靈公以十五年伐我北鄙至是連伐我者五歲再圍成又圍桃圍防我之虐於諸侯未有甚於齊也故嘗以叔孫豹請於晉晉辭之豹曰敝邑之急朝不及夕引領西望曰庶幾乎比執事之間恐無及也於是苟偃從之而諸侯之師無不盡其力則事雖以魯出而所以圍齊者不以魯也故薄齊之城周其四門非共惡之能若是乎蔡失其國周公復封之為之訓曰睦乃四鄰夫不能睦其鄰者鄰亦不能睦也國何以守故以齊環一

見法焉

曹伯負芻卒于師楚公子午帥師伐鄭

公子午楚大夫之三命者也

十有九年春王正月諸侯盟于祝柯

此圍齊之諸侯也齊未服故再盟何以不序一事

而再見也

晉人執邾子

晉前執邾子以討伐我之罪矣明年邾人不受令

又伐我南鄙而執焉復取其田而舍之非伯討也

故以人執

公至自伐齊

此圍齊也何以致伐齊圍齊所以伐齊也伐不服

而後圍圍不言伐故以伐致也

取邾田自漵水

內取外田不書此何以書不一地也取者我所有

而取之者也非所有而取之謂之盜是猶言取濟

西田爾漵水邾水之經於我者也言自漵水則有

非止於漵水者矣故於是復取漵東田

季孫宿如晉葬曹成公夏衛孫林父帥師伐齊秋七

月辛卯齊侯環卒晉士匄帥師侵齊至穀聞齊侯卒

乃還

師未有言還者此何以言還善士匄之不伐喪也

葉子曰趙盾納捷菑于邾以邾人之辭弗克納而還春秋雖善趙盾而不言還趙盾不免於稱人士句亦受命侵齊何以得與其還而以名氏見不伐喪將之事也納君非將之事也趙盾不得以師而專廢置君士句不得以伐喪而致為師之道此士句所以異乎趙盾也

八月丙辰仲孫蔑卒齊殺其大夫高厚

靈公欲以公子牙易太子光而使高厚傅之厚從君於昏而不能正於是光立而殺高厚高厚之死罪累上也故以國殺

鄭殺其大夫公子嘉

公子嘉鄭大夫之三命者也尉止之亂嘉獨免既得而專召楚師至於純門鄭伯不能正故公孫舍之公孫夏討尉止之難與純門之師帥國人殺嘉而分其室公子嘉之死罪累上也故以國殺

冬葬齊靈公城西郭

畏齊也城壞而當城則城之爾畏齊難而城其西郭非所以守國也

叔孫豹會晉士句于柯城武城

畏齊也叔孫豹自晉會士句還曰齊猶未也不可以不懼乃復城武城

二十年春王正月辛亥仲孫速會莒人盟于向

仲孫速吾大夫之三命者也

夏六月庚申公會晉侯齊侯宋公衛侯鄭伯曹伯莒子邾子滕子薛伯杞伯小邾子盟于澶淵秋公至自會仲孫速帥師伐邾蔡殺其大夫公子燹

燹以楚使蔡無常求從文侯之志以事晉蔡人畏楚不從遂殺燹以止其謀公子燹之死罪累上也故以國殺葉子曰公子燹其猶以為罪歟蔡自翟泉之役不復與諸侯會蓋附楚久矣故至于厥貉遂與楚子同見以謀伐宋及晉雖嘗以卻缺討之僅為城下之盟而不能服也自是晉復以藥書再侵之蔡雖小弱息肩者七十餘年古之君子作事

必稽于眾未有違眾而能成者也方晉楚爭強蔡介於兩國之間事楚與晉無有不受其弊者今欲安於楚使燹而能為蔡謀必有絕楚而能保於晉者然後可為今未有以得晉而輕與楚絕身且不能自保況於蔡乎故君子不以晉楚為辨而以保其國者為難則堯之所謂稽于眾舍已從人者也故以燹一見法焉

蔡公子履出奔楚

公子履蔡大夫之三命者也

陳侯之弟黃出奔楚

黃哀公之母弟也慶虎慶寅執政畏黃之偪而愬

於楚曰與蔡變同謀黃不能安於是奔楚以自直以陳侯為不能兄也故目弟焉

叔老如齊冬十月丙辰朔日有食之季孫宿如宋

二十有一年春王正月公如晉邾庶其以漆閭丘來

奔

庶其邾大夫之再命者也以漆閭丘來奔者何據其邑叛而歸我也何以不言叛諱納叛臣也漆邑也閭丘亦邑也何以不言及皆私邑也葉子曰左氏以邾庶其及莒牟夷邾黑肱為三叛人書名齊豹衛之司寇殺衛侯之兄貶而不書名為春秋之義使欲蓋而名章求名而不得然歟非也夫豹以

正卿而殺其君之兄是何足以為名邾莒雖小國再命之大夫自得以名見三人之奔亦何以知其欲蓋其惡歟以為當時之意邪豈有殺君之兄而人不知竊邑以叛君而可以隱者也以為有求於春秋而然邪則春秋之作三人固不能前知此左氏不知小國有得名之大夫而邾以弱莒以用夷適無事以屢見爾然莒有慶有挈邾有畀我有快皆非以地叛者何為而亦名也夫名不名春秋固有常法大夫而以其邑叛此與衛孫林父晉趙鞅荀寅士吉射何以異其惡蓋有不待貶絕而自見者春秋未嘗加之辭何於庶其三人而獨異哉

夏公至自晉秋晉欒盈出奔楚

欒盈晉大夫之三命者也

九月庚戌朔日有食之冬十月庚辰朔日有食之曹伯來朝公會晉侯齊侯宋公衛侯鄭伯曹伯莒子邾子于商任

二十有二年春王正月公至自會夏四月秋七月辛酉叔老卒冬公會晉侯齊侯宋公衛侯鄭伯曹伯莒子邾子薛伯杞伯小邾子于沙隨公至自會楚殺其大夫公子追舒

公子追舒楚大夫之三命者也追舒爲令尹寵佞人觀起而富之楚子不能禁旣而復將討焉乃與其子弃疾謀之弃疾不從遂殺追舒追舒之死罪累上也故以國殺

二十有三年春王二月癸酉朔日有食之三月己巳杞伯臼卒夏邾畀我來奔

畀我邾大夫之三命者也

葬杞孝公陳殺其大夫慶虎及慶寅

慶虎慶寅皆陳大夫之三命者也寅虎之殺也二人旣愬公子黃於楚不勝而以陳叛故陳侯以屈建圍陳而殺寅虎寅從虎故言及慶虎寅虎之死罪累上也故以國殺

陳侯之弟黃自楚歸于陳

自楚者何楚有奉也

晉欒盈復入于晉入于曲沃

曲沃欒氏之邑也復入求復也欒盈既出奔楚會諸侯于商任沙隨使錮欒盈無納盈盈以齊析歸父入曲沃以求復其曰入于晉何盈先入於絳不克而後返其邑也故言入逆辭也

秋齊侯伐衛遂伐晉八月叔孫豹帥師救晉次于雍榆己卯仲孫速卒冬十月乙亥臧孫紇出奔邾臧孫紇吾大夫之三命者也

晉人殺欒盈

欒盈既返曲沃晉人圍而克之盡殺欒氏之族黨不言殺其大夫位已絕矣非復大夫也曰晉人討賊之辭也

齊侯襲莒

襲者何掩其不備也齊莊公自晉還不入而伐莒門于且于蓋掩之也傷股而退明日將再戰復使人夜載甲入于且于之隧遂以勝莒故君子以是為襲也葉子曰韓之戰秦人獲晉惠公不言師敗績曰獲晉侯君獲重於敗也鄢陵之戰晉射楚王中其目敗績不言師曰楚子君敗重於師也然則齊侯亦傷股而敗矣何以不以君敗為文蓋詐戰也結日而後戰君子猶不與焉況乘人之不備而

詐之乎得免吳遏之卒幸矣昔者子鈞而不綱弋不射宿謂其非愛物之道也而況於人乎是以古之用師必先之以文告之辭威讓之令至於不服而後伐之彼輕千乘之貴而幸一日之勝君子不與也故以齊侯一見法焉

二十有四年春叔孫豹如晉仲孫羯帥師侵齊

仲孫羯吾大夫之三命者也

夏楚子伐吳 秋七月甲子朔日有食之既齊崔杼

帥師伐莒大水八月癸巳朔日有食之公會晉侯宋

公衛侯鄭伯曹伯莒子邾子滕子薛伯杞伯小邾子

于夷儀冬楚子蔡侯陳侯許男伐鄭公至自會陳鍼

宜咎出奔楚

鍼宜咎陳大夫之三命者也

叔孫豹如京師大饑

二十有五年春齊崔杼帥師伐我北鄙

齊自同圍之後我以叔老往聘而怨稍平矣至是

復伐我則以仲孫羯之侵故也我何以保其國歟


葉子曰自襄以前莊僖文成之伐者各一皆齊而

已至文而邾復見伐襄而莒復見伐於是終其世

三國見伐者十有三甚乎襄之不能為國也齊伐

其北莒伐其東邾伐其南齊侯之師遂至圍成圍

桃園防莒亦進而圍台則非特及其鄙而已我雖





城防城西郭城武城曾不足以自守而區區方託  
晉以為雍榆之救固已非怒又從而侵之豈吾所  
得已哉皆晉之故此其所以訖不能振也春秋固  
志之矣

夏五月乙亥齊崔杼弑其君光

稱名氏以弑者大夫弑君之辭也崔杼既立莊公  
而相之莊公通其室而杼弑焉公登臺而請弗許  
請盟弗許請自刃於廟弗許公踰牆射之中股反  
隊而弑之是以為杼之弑也

公會晉侯宋公衛侯鄭伯曹伯莒子邾子滕子薛伯  
杞伯小邾子于夷儀六月壬子鄭公孫舍之帥帥入  
陳秋八月己巳諸侯同盟于重丘公至自會衛侯入  
于夷儀

夷儀衛邑也何以不言入衛未得衛也剽在而內  
未有援則其歸為難矣故言入辭也何以不名未  
得國則不嫌於為君也

楚屈建帥師滅舒鳩

屈建楚大夫之三命者也

冬鄭公孫夏帥師伐陳

公孫夏鄭大夫之三命者也

十有二月吳子遏伐楚門于巢卒

巢國也諸侯不生名吳子伐楚則何以名非名也

三百五十五  
吳子卒矣文不可再見舉卒之名加之伐楚之上  
無嫌也何以目門於巢不正吳子不以禮假道而  
不得其死也吳子伐楚以報舟師之役假道于巢  
不納攻其門巢牛臣隱于短牆以射之卒巢楚之  
與國也吳子欲復怨於楚而道於其國不納而攻  
之吳子則已過矣巢人之黨其所與而賊夫人之  
君非諸侯相爲賔之道也

二十有六年春王二月辛卯衛甯喜弒其君剽

稱名氏以弒者大夫弒君之辭也甯喜衛大夫之  
三命者也喜甯殖之子殖既從孫林父逐獻公而  
立剽及疾復召喜命之使謀納獻公故喜先攻孫  
氏而殺剽是以爲吉之弒也葉子曰春秋以正治  
不正不以不正治正剽之與衍蓋不兩立也以衍  
之歸爲正則剽之死不得爲正矣何以加喜之罪  
而名之弒哉此剽與衍之說非喜與剽之說也夫  
所謂君臣者一日北面而事之皆君也方孫林父  
之逐衍殖以爲不然則去而違之可矣既與之立  
則剽者殖之君也喜者受命於殖者也孰有北面  
事之十有三年而不以爲君者乎爲衍則可以殺  
剽爲喜則不可以殺剽此喜與衍之說也是以書  
剽有三道以衛言之既已與諸侯盟會矣不可以  
不謂之君以甯喜言之殖已立而君之矣喜受命

而殺之不可以不成其為君以衍言之則公孫剽而已矣別嫌明微非春秋不能辨是故不以其正者害其不正也

衛孫林父入于戚以叛

戚孫林父之邑叛者何叛于晉也晉於是疆戚田葉子曰楚取宋彭城以封魚石而求入攘人之地以劫其君也晉取戚而納林父之叛私人之地以背其君也然而春秋不著晉之罪者彭城之罪在楚戚之罪在林父各以其重者書也

甲午衛侯衍復歸于衛

衍何以言復歸易辭也甯喜援之公子鱒與之則其歸為易矣

夏晉侯使荀吳來聘

荀吳晉大夫之三命者也

公會晉人鄭良霄宋人曹人于澶淵

此趙武之會也何以曰晉人不正其登叛人以謀其君且疆戚田故貶而人之也何以不沒公公亦與有貶也

石林先生春秋傳卷第十六

後學

成德

校訂

石林先生春秋傳卷第十七

葉氏

襄公三

秋宋公殺其世子痤

何以挈宋公殺世子母弟目君甚之也

晉人執衛甯喜


喜負弒君之罪晉不以討而以林父之愬執之非

伯討也故以人執

八月壬午許男甯卒于楚冬楚子蔡侯陳侯伐鄭葬

許靈公

二十有七年春齊侯使慶封來聘



慶封齊大夫之三命者也

夏叔孫豹會晉趙武楚屈建蔡公孫歸生衛石惡陳孔奐鄭良霄許人曹人于宋

趙武公孫歸生石惡孔奐晉蔡衛陳大夫之三命者也此向戌之請也不列向戌地于宋則向戌在焉也

衛殺其大夫甯喜

甯喜初欲納獻公公使公子鱣與喜言曰苟反政由甯氏祭則寡人獻公立而甯喜專公患之其大夫公孫免餘殺喜尸諸朝甯喜之死罪累上也故以國殺

衛侯之弟鱣出奔晉

鱣定公之子獻公之母弟也獻公既背鱣之約而殺甯喜鱣不義其所為而去之終身不仕則衛侯之不能兄也故目弟

秋七月辛巳豹及諸侯之大夫盟于宋


此前會宋諸侯之大夫也始宋向戌善于晉趙武又善于楚屈建欲弭諸侯之兵以為名乃如晉告武又如楚告建遂如齊如秦皆許之告於小國亦從故即宋為會而盟焉諸侯不在而曰諸侯之大夫受命於其君也於是中國不出夷狄不入而天下之兵熄則向戌之為也豹不氏一事而再見者

卒名之也再地宋善之也葉子曰是會左氏得其  
 事而不盡其義故言楚人衷甲及齊宋請邾滕晉  
 楚爭先之事析西門蒙門為二盟與其本志不類  
 穀梁知其義而不知其事故知諸侯不在而曰諸  
 侯之大夫為異於溴梁之不臣然以豹不氏為恭  
 則非是乃公羊則既不知事又不知義遂以為石  
 惡在是而殆諸侯且公羊豈不知遂以夫人婦姜  
 至自齊再見遂而不稱公子者乎袁僑之盟固已  
 不能別此又適在公子縛出奔之後故以意逆之  
 而歸惡於衛以此見三家之傳經蓋有知而不能  
 詳詳而不能盡與不能知而意之者皆未嘗親得  
 其所聞者也非深於經者不足與知此

冬十有二月乙亥朔日有食之

二十有八年春無冰夏衛石惡出奔晉邾子來朝秋  
 八月大雩仲孫羯如晉冬齊慶封來奔十有一月公  
 如楚十有二月甲寅天王崩乙未楚子昭卒

二十有九年春王正月公在楚夏五月公至自楚  
 前未有書公在者此何以書危夷狄以存公也葉  
 子曰成公嘗以七月如晉明年三月致正月不書  
 在晉昭公嘗以冬如晉明年夏致正月不書在晉  
 諸侯以兩君之好相見於五服之內則何為焉而  
 公之如楚過矣昭公於鄆不書在於乾侯書在以



失國為危也公如晉不書在於楚書在以失中國為危也

庚午衛侯衍卒闔弒吳子餘祭

闔賤者也不言盜以吳子為不能保其身也古者使墨者守門劓者守關宮者守內刑者守圉髡者守積各不廢其材而任以職吳子刑越俘使皆守舟又即而觀焉非任官之道也賤者不列於君臣故不言盜弒吳子不君而輕其身故闔特言弒加之以君之辭而後見吳子之不君也弒則何以不言其君越俘不可以君吳也

仲孫羯會晉荀盈齊高止宋華定衛世叔儀鄭公孫段曹人莒人滕人薛人小邾人城杞

荀盈高止華定世叔儀公孫段晉齊宋衛鄭大夫之三命者也城杞者何修舊也晉平公杞出故率諸侯為杞城諸侯以二王之後不以晉之私而共城之諸侯之善也

晉侯使士鞅來聘

士鞅晉大夫之三命者也

杞子來盟吳子使札來聘

札吳大夫之再命者也吳子始得以爵書進之也葉子曰壽夢之子同母者四兄弟皆欲迭為君而致國於札札不受而去焉於是之魯之齊之鄭之



衛之晉歷五國而後歸此札之賢也然則吳何以得進以吳而有札能以禮交於中國雖欲夷狄之不可也則吳之所為而已春秋之義或與其文或與其實楚丘之城非不善而文不得許其專吳子之聘未必善而文不得不與其進故札出僚得國闔廬卒以弒僚不以是罪札之來蓋其與之在此不在彼也公羊獨以為賢季子者誤矣

秋九月葬衛獻公齊高止出奔北燕冬仲孫羯如晉三十年春王正月楚子使蘧罷來聘

蘧罷楚大夫之三命者也

夏四月蔡世子般弒其君固五月甲午宋災

外災不書此何以書為二王後見重也

宋伯姬卒天王殺其弟佞夫

佞夫景王之母弟也何以挈天王殺世子母弟目君甚之也

王子瑕奔晉

瑕王之大夫也何以不言出周非大夫所得同有也何以知其自周出佞夫靈王之子其居固在京師矣靈王崩僭括欲立佞夫而不克景王立尹言多五子殺佞夫瑕以佞夫黨而奔晉其出固自周也

秋七月叔弓如宋





叔弓吾大夫之三命者也

葬宋共姬


共諡也內女為夫人葬未有舉諡者此何以書賢伯姬也葉子曰古者生無爵死無諡死而諡周也謂士以下言也士則有爵矣蓋諡者所以易名也葬而卒哭卒哭而諱必有諡焉然後可諱故曰諡者所以尊名也乃婦人則非有爵者也非常名者也安用諡乎周之后妃其遠者莫如姜嫄姜嫄無諡近者莫如大任大姁大任大姁無諡則周婦人未嘗有諡也魯夫人諡自文姜始然其前已見聲子則非特夫人有諡妾亦有諡矣不知為之者何時自是魯夫人無不諡者至宋諡共姬則非特魯也凡諸侯皆諡矣故錄共姬之諡雖以表其賢然非所諡而諡之亦以著其失則雖魯亦不得無罪也

鄭良霄出奔許自許入于鄭鄭人殺良霄

良霄既自墓門之濱入介於襄庫為亂以伐北門子駟子帶帥國人討而殺之不書大夫位已絕矣非復大夫也曰鄭人討賊之辭也

冬十月葬蔡景公

葬未有言討賊者景公何以得葬正天下之為人父者也蔡景公為大子般娶於楚而通焉般於是



弒景公君子以為亂父子之大倫而絕人道者人亦得以絕之也葉子曰蔡固之惡子產蓋知其必有子禍矣然父不父子不可以不子固之惡雖大春秋其可以免般而不討乎昔者齊景公嘗問政於孔子孔子曰君君臣臣父父子子公曰善哉信如君不君臣不臣父不父子雖有粟吾得而食諸孔子之為是也以景公繼弒君而不討崔杼者也然豈不曰君臣父子各得其正而後政可為者乎使臣臣而君不君子子而父不父雖其義有不可亂而為君與父之禍無時而可息也君子以是不以般為嫌微致其意曰必君君而父父然後可以盡天下為臣與子之責則正身而齊家齊家以治國而天下無與為亂者矣故以蔡固一見法焉

晉人齊人宋人衛人鄭人莒人邾人滕人薛人杞人小邾人會于澶淵宋災故

會未有日事者此何以言宋災故為二王後見重也大夫何以皆書人欲歸宋財而後不能故貶而人之也大夫會而不終其約者多矣何獨責於澶淵救災恤患諸侯之義也人皆可以自致未有國而無財者也何必待會今勤十二國之眾而無一如其言豈皆無是心哉待人而後為之爾孰有因

人以為義者乎君子是以原其情而著其事也三十有一年春王正月夏六月辛巳公薨于楚宮非正也

秋九月癸巳子野卒巳亥仲孫羯卒冬十月滕子來會葬

諸侯會葬非禮也禮天子葬同軌畢至有故則大夫會葬諸侯葬同盟畢至大夫會葬

癸酉葬我君襄公十有一月莒人弒其君密州稱人以弒微者弒君之辭也

昭公一

元年春王正月公即位叔孫豹會晉趙武楚公子圍齊國弱宋向戌衛齊惡陳公子招蔡公孫歸生鄭罕虎許人曹人于虢

公子圍國弱齊惡公子招罕虎楚齊衛陳鄭大夫之三命者也此尋宋之盟也楚何以先諸侯強也葉子曰自襄以來晉主盟齊楚皆未入會宋未嘗不先諸侯蓋齊方與楚也雞澤之會齊始以世子光來猶在邾人下至邢丘而齊人居宋人上則齊已亢矣澶淵之會齊侯始入會遂居宋公上宋之會楚始入會屈建遂居蔡衛上至是楚公子圍先國弱而向戌在三夷狄愈強雖齊亦為之屈而二主之後微矣

三月取鄆

鄆魯鄆也莒嘗侵之以號會而歸何以不言其歸受命而歸非自歸也葉子曰吾何以知此為魯鄆凡內取外邑不書內取外邑必先見伐不正其以伐取而後書也且莒鄆非邑附庸之國也則固不得為莒邑矣會以正月取以三月左氏謂三月諸大夫嘗同盟莒子愬于會亦非是會而盟未有不志於春秋者何為略而不書乎然則非取莒鄆以為附庸歟亦非也後見疆田屬為附庸則不疆田也

夏秦伯之弟鍼出奔晉

鍼景公之母弟也有寵於桓公而富景公立其母畏景公不能容曰弗去懼數其罪乃使之出以景公為不能也故曰弟焉

六月丁巳邾子華卒晉荀吳帥師敗狄于大鹵秋莒去疾自齊入于莒

去疾公子之未氏者也自齊齊有奉也自未有言入此何以言入逆辭也衛朔入于衛齊小白入于齊皆以不正奪正故謂之入莒犁比生去疾及展與展輿立而去疾奔其復國不得以歸言之則去疾亦奪展輿如衛朔齊小白者也  
莒展輿出奔吳



展輿踰年之君也何以不書爵密州未葬也

叔弓帥師疆鄆田

疆溝封之也帥師而城邑已強矣帥師而疆田又甚也

葬邾悼公冬十有一月己酉楚子麇卒

麇公羊穀梁作卷左氏作麇當從左氏公子圍共王之子康王之弟而麇之叔父也康王卒麇立圍欲篡國蓋鄰國莫不知焉而麇莫之戒故卒弑之而以疾赴魯史有知之者矣春秋因其辭而書卒正麇之不能君也葉子曰臣弑君猶有不免於貶者歟曰此非圍之說有國之說也天子有天下諸

侯有一國皆以其身受宗廟社稷之託必其身安而後天下國家可保也坤之初六曰履霜堅冰至孔子傳之曰臣弑其君子弑其父非一朝一夕之故其所由來者漸矣由辨之不早辨也天下之禍莫大於弑父與君使為人父與君者常能辨之於早如履霜而知堅冰則天下豈復有弑哉圍為令尹之始鄭子羽固知其必代麇矣及號之會遂居諸侯大夫之上雖趙孟不能屈以二執戈者前則叔孫豹蔡子家鄭行人揮皆知其必君而非復公子也故其城犢櫟與邾則子產知其欲去黑肱伯州犁二人以行大事遠罷問政而不敢對則叔孫

豹知其與聞其意而佐之匿其情此其禍萌於即位之初而形見於鄰國之遠楚之君臣曾莫之慮而預為之圖則圍何憚而不為乎春秋以為圍之惡天下不患於不知而吾治天下之弒者為法亦已嚴矣適得一人焉可以為後世為人君者之戒是以不嫌於免圍而以麋一見法焉或者疑公羊穀梁書麋名不同春秋後見楚子虔卒為靈王非所謂圍乎以左氏之說為妄吾考於穀梁載慶封就戮之言曰無或如楚共王之子圍弒其兄之子而代之君與左氏之辭合則麋固圍之弒而圍之為靈王審矣圍與虔名錯見或曰圍即位而改為虔也

楚公子比出奔晉

公子比楚大夫之三命者也

二年春晉侯使韓起來聘

韓起晉大夫之三命者也

夏叔弓如晉秋鄭殺其大夫公孫黑

公孫黑鄭大夫之三命者也黑逐良霄已而後與

子南爭室強盟薰隧子產不能討遂欲作亂去游

氏而代其位子產聞而懼使吏數其三罪而誅之

公孫黑之死罪累上也故以國殺

冬公如晉至河乃復

復者事未畢之辭也蓋晉以公弔少姜為非禮辭公而不見乃難辭以公復之為難也葉子曰恭近於禮遠恥辱也是在周易所謂巽在牀下者君子不貴焉諸侯之相朝固非禮矣自公即位二十三年之間朝於晉者五唯其末言有疾則外此皆非公之自復晉辭公也是豈晉得以辱公哉蓋公嘗為少姜卒而往弔矣為季孫意如執而往請矣以千乘之君而弔嬖妾且為臣而親行則晉不得不易公也故或以莒人之愬而辭公或以鮮虞之伐而辭公使公知恭之不妄禮則一辭公固可以止何待至于再至于三而不已乎如是而流離於外不得志於齊猶有望於晉以為寄傍徨乎乾侯卒至於死而不悟此春秋所以屢書不少殺獨以有疾一著其實者所以志公之愧也

季孫宿如晉

三年春王正月丁未滕子原卒夏叔弓如滕五月葬滕成公秋小邾子來朝八月大雩冬大雨雹北燕伯款出奔齊

四年春王正月大雨雹

大雨雹左氏作雨雹公羊穀梁作雨雪當從左氏記災也葉子曰吾何以知雨雪之為雹歟正月大雨雪非災也

夏楚子蔡侯陳侯鄭伯許男徐子滕子頓子胡子沈子小邾子宋世子佐淮夷會于申

楚子何以先諸侯主會也晉自悼公卒而平公立中國日益衰楚靈王方侈止許鄭以求諸侯平公不敢與之爭而從焉則中國幾於無霸也楚於是遂主會楚子先諸侯則何以不貶楚所以正諸侯也一人衡行於天下武王恥之諸侯知晉平公不足霸則勿會而已會而先楚子遂使楚子得以爭中國則晉與諸侯之罪也葉子曰楚子始欲求合諸侯而未定問於子產曰晉其許我乎又曰諸侯其來乎則楚子固自以為不足服諸侯而懼其叛也當是時使晉稍強其誰敢與爭晉強而諸侯聽之則楚亦不能肆其志而晉侯方溺於嬖寵豈復有志於中國哉楚偃然得專於諸侯諸侯舍晉無所附則亦不得已而從楚晉雖不會自胡沈小國至於淮夷無不在楚於是伐吳滅陳滅蔡殺于徵師楚之得志於中國未有盛於此時非楚子所能為也黃池之會以夫差之強定公一數之且不敢不聽而平公不能行之於申故特挈楚子而無貶辭所以見中國之無霸而憫諸侯之無能為也

楚人執徐子

徐吳出也楚方與吳爭強而不能服疑徐子為貳



於吳因會而執之非伯討也故以人執

秋七月楚子蔡侯陳侯許男頓子胡子沈子淮夷伐

吳

楚子既得志故復合諸侯以討吳何以言楚子伐

吳猶會申也

執齊慶封殺之

此伐吳也何以言執齊慶封殺之慶封弑齊君而

吳納之伐吳所以為齊討也何以不言楚人殺齊

慶封不與楚子得討賊之辭也楚子亦一慶封爾

故先名而後言殺之之緩辭也不與其正之辭也

遂滅賴

賴國也孰滅之諸侯滅之也

九月取鄆

鄆莒附庸之國也莒前滅鄆取鄆何以復見莒復

封之以為附庸也去疾立而不撫鄆故我取焉

冬十有二月乙卯叔孫豹卒

五年春王正月舍中軍

舍者何不用也季氏始分公室作三軍叔孫氏為

中軍叔孫豹卒復欲兼二氏故毀其軍四分公室

而擇其二二子各取其一皆盡征而貢於公魯自

是無賦矣何以不言復二軍魯初無二軍也葉子

曰三軍之作叔孫豹初不欲也盟諸僖閔詛諸五

父之衢蓋知季氏之意後必有甚於此者矣故復竊其名以行其志中軍舍而季氏兼取其二則其舍有進於三軍者是以齊國書之役孟氏以孺子洩帥右師季氏以冉求帥右師各以其家臣為之將而叔孫武叔獨退而蒐乘則叔孫氏為無軍矣然季孫意如叔弓仲孫矍復以三軍伐莒見於昭季孫斯叔孫州仇仲孫何忌復以三軍伐邾見於哀則三軍之施舍時出而用之初不繫其所為將亦不必皆三家之臣但分其民與賦而已故作三軍而前已見四軍舍中軍而後復見三軍公羊穀梁或以為近正或以為近古者皆不知其事而意之也

楚殺其大夫屈申

屈申楚大夫之三命者也申楚之執政也靈王弑君而不能討及使之圍朱方而不得志於慶封故吳復來伐疑其貳於吳而殺之屈申之死罪累上也故以國殺

公如晉夏莒牟夷以牟婁及防茲來奔

牟夷莒大夫之再命者也何以言牟婁及防茲牟婁私邑防茲公邑不以私邑累公邑也

秋七月公至自晉戊辰叔弓帥師敗莒師于蚡泉秦伯卒冬楚子蔡侯陳侯許男頓子沈子徐人越人伐

吳

越始與伐何以得稱人能從討吳則越為可進也諸侯不可從楚而可伐吳故不以從楚廢伐吳也六年春王正月杞伯益姑卒葬秦景公夏季孫宿如晉葬杞文公宋華合比出奔衛華合比宋大夫之三命者也

秋九月大雩楚遠罷帥師伐吳冬叔弓如楚齊侯伐北燕

七年春王正月暨齊平

孰暨之我也何以不言及齊平連而逮彼曰及率而強彼曰暨齊自慶封來奔遂走之吳楚為齊討慶封而我不會齊蓋有憾於我矣故我求齊率之以為平叔孫婁於是如齊以涖盟

三月公如楚叔孫婁如齊涖盟

叔孫婁吾大夫之三命者也

夏四月甲辰朔日有食之秋八月戊辰衛侯惡卒九月公至自楚冬十有一月癸未季孫宿卒十有二月癸亥葬衛襄公

八年春陳侯之弟招殺陳世子偃師

兩下相殺不書此何以書重殺君之世子也其曰陳侯之弟招者何陳哀公生世子偃師既又生公子留而嬖以留屬於招哀公疾招遂殺偃師而立

留以哀公為親其弟而忘其子也故目弟焉

夏四月辛丑陳侯溺卒叔弓如晉楚人執陳行人于  
徵師殺之

于徵師楚大夫之三命者也徵師以哀公之赴于  
楚且告立君而以公子勝之愬不治招而殺徵師  
非伯討也故以人執先名而後言殺之之緩辭也  
不與其正之辭也

陳公子留出奔鄭

留未逾年之君也其曰公子留者何留偃師之立  
也不與留之得成君則是猶公子留也

秋蒐于紅

蒐春田之名也何以書不時且非其地也何以不  
言公季孫意如復得政欲以動其民則非公之所  
為也葉子曰四時之田天子諸侯之常事也不書  
桓書大閱大閱冬事也冬田則狩也莊書治兵治  
兵秋事也秋田則獮也不記狩記大閱不記獮記  
治兵以其為之者不以田也桓書狩于郎莊書狩  
于禚不記大閱而記狩于郎于禚以其為之者不  
以武事也自莊而後田之不見于春秋者六世非  
皆廢而不舉其為之者以常事則不書也至昭而  
累書蒐大蒐者三定而累書大蒐者二是豈習武  
事者哉蓋自季氏作三軍凡君之政皆在三家既



而復舍中軍以為二公皆不得與焉臣之者三家也征之者三家也貢之者三家也則其所謂蒐與大蒐者皆自以閱其軍實而已是以自紅而後一名之曰蒐而加大焉亦非復先王春田之事比蒲之役邾子來會公而不書公則此五書皆不見公公非不與也以非公之為則不書也

陳人殺其大夫公子過

公子過陳大夫之三命者也過招之黨也哀公同以留屬而殺偃師者楚既殺于徵師故招懼而歸罪於過以說楚雖招之為固亦陳人之所欲討也大夫有罪而眾殺之故以人殺

大雩冬十月壬午楚師滅陳執陳公子招放之于越殺陳孔奐

楚為偃師討而滅陳非討賊也滅國而已不殺招而放之則招之自免者亦不得行於公子過孔奐招之黨而反殺之故奐雖得討賊之辭而招不正其為放是以先名而後言放之之緩辭也不與其正之辭也此楚子則曷為謂之師不正其伯討則是其為師焉者而已矣

葬陳哀公

陳已滅矣哀公何以得葬楚子葬之以說陳也葬臣子之事也諡臣之所以誅其君也楚子知滅陳

之為愧不知奪人之國而身行其臣子之事為尤愧也故齊取紀而書葬紀伯姬楚滅陳而書葬陳哀公春秋正其辭而一施之焉

石林先生春秋傳卷第十七

後學 成德 校訂

石林先生春秋傳卷第十八

葉氏

昭公二

九年春叔弓會楚子于陳許遷于夷夏四月陳災外災不書此何以書存陳楚既滅陳而以其國災告君子以為陳非楚之所得有此陳災非楚災也故正其名以存陳也葉子曰春秋滅國多矣君子何獨於陳致意焉陳舜之後而天子以為三恪者也子在齊聞韶三月不知肉味曰不圖為樂之至於斯而況其後乎陳亡而舜不祀矣楚滅六臧文仲聞之猶曰臯陶不祀忽諸此君子之所以欲存

陳也

秋仲孫矍如齊

仲孫矍吾大夫之三命者也

冬築郎囿

築囿者何包地以屬民也古者諸侯一囿成築鹿  
囿已過矣今又於郎以築焉成公之囿以鹿名見  
從禽也昭公之囿以郎名見包地也其為民則俱  
已殆矣

十年春王正月夏齊欒施來奔

欒施齊大夫之三命者也

秋七月季孫意如叔弓仲孫矍帥師伐莒

季孫意如吾大夫之三命者也師舉元帥其言意  
如弓矍者大夫強而各為師也


戊子晉侯彪卒九月叔孫婣如晉葬晉平公十有二

月甲子宋公成卒

十有一年春王二月叔弓如宋葬宋平公夏四月丁

巳楚子虔誘蔡侯般殺之于申

誘者何詐之也楚子在申召蔡靈侯伏甲而饗醉  
而執之葉子曰蔡人殺陳佗春秋以討賊之辭與  
之般負弒君之罪十有三年諸侯不能討而楚討  
焉然不得與陳佗同辭而楚子不免於名何也楚  
子且不可以討齊慶封何以討般而況於詐之



乎故衛侯燬以誘滅邢侯名楚子虔以誘殺蔡侯名然則何以不曰楚子虔誘執蔡侯般于申賤之也可與齊慶封同辭不可與滕嬰齊同辭

楚公子弃疾帥師圍蔡

公子弃疾楚大夫之三命者也

五月甲申夫人歸氏薨

襄公之夫人也

大蒐于比蒲

蒐言大大比之禮也古者寓兵於農自五家之比為閭為族為黨為州而六卿立焉自五人之伍為卒為兩為旅為師而六軍立焉四時之田以習武

事者軍而已合兵與農而校其夫家之眾寡均土地閱老幼至於貢賦車輦無不盡治則三歲一脩之曰大比常時不書此何以書季氏之為也葉子曰吾何以知大蒐之為大比歟大蒐之禮以辨鼓鐸而已然而春秋之時晉作三軍以謀帥則謂之蒐鄭因火以簡兵則謂之蒐有伐而告諸侯稱蒐有社而誇國容稱蒐者則非春田也大比也魯自作三軍三分公室取其二民之與賦猶有其一也至舍中軍四分公室而盡征之則民之與賦皆非公之所得有大蒐所以書豈以兵民之權盡在於季氏內以脅其君而外以威其敵者歟左氏以為






自根牟至于商衛革車千乘此非紅之事比蒲之  
 為也故昭公以是而失位定公以是而得國彼無  
 以制之則君之所廢置唯其所欲為昭十有一年  
 而再舉猶云可也定比年而迭舉則有甚焉哀公  
 所以欲假越而為之謀者誠知其無以自為國也  
 仲孫貜會邾子盟于稷祥秋季孫意如會晉韓起齊  
 國弱宋華亥衛北宮佗鄭罕虎曹人杞人于厥慙  
 華亥北宮佗宋衛大夫之三命者也

九月己亥葬我小君齊歸  
 齊諡也

冬十有一月丁酉楚師滅蔡執蔡世子有以歸用之  
 有未踰年之君也何以稱世子與之以繼世也有  
 靈公之子誅君之子不立疑不得繼世者也楚子  
 圍蔡有不為之服八月而後克之執有以歸而用  
 焉非以有歸也以為如是而後世子之道盡矣用  
 之者虐之也是以先名而後言用之之緩辭也不  
 與其正之辭也此楚子也則曷為謂之師不正其  
 伯討則是其為師焉者而已矣

十有二年春齊高偃帥師納北燕伯于陽  
 高偃齊大夫之三命者也陽北燕之邑也何以不  
 言納于北燕未得北燕也其曰納與其納也  
 三月壬申鄭伯嘉卒夏宋公使華定來聘公如晉至



河乃復五月葬鄭簡公楚殺其大夫成熊

成熊楚大夫之三命者也熊與鬬氏同出於若敖

氏楚人惡鬬椒之亂或譖成熊於楚子曰若敖氏

之餘也成熊知之不能去楚子於是殺之成熊之

死罪累上也故以國殺

秋七月冬十月公子慙出奔齊

公子慙吾大夫之三命者也

楚子伐徐晉伐鮮虞

鮮虞白狄之別種也晉何以舉國狄之也荀吳欲

伐鮮虞偽會齊師而假道焉以入昔陽遂因其師

而伐鮮虞詐而乘人以是為夷狄之道也

十有三年春叔弓帥師圍費

費季氏之邑也邑不言圍此何以言圍以公之不

能正費也南蒯季氏之家臣季平子不禮於南蒯

謀出季氏立公子慙不克而叛於齊有季氏之強

而後南蒯得以肆其惡以國有政焉則不至於是

也

夏四月楚公子比自晉歸于楚弑其君虔于乾谿

弑君未有言自者何以言公子比自晉歸於楚比

歸而後楚子可得弑也靈公為無道作乾谿之臺

三年不成公子弃疾召比脅而立之然後令于乾

谿之役曰比已立矣後歸者不得復其田里眾罷

而去靈王無與處於是經而死故以比主弒也葉子曰召比脅而立之者弃疾也今以比主弒則弃疾為免歟春秋之義常加於人之所疑而不加於人之所不疑弃疾之罪固無得而逃矣比之非其謀則世或疑其可免焉使比知己之不可立效死而不聽則靈王固未遽死矣今告之謀而聽立之為王而從雖曰脅之終不以己之私易靈王之死則靈王之死非比為之乎治弃疾則比免治比則弃疾不免君子於是以此主弒也

楚公子弃疾殺公子比

此討賊也何以言公子弃疾弃疾亦弒君者也故以兩下相殺之辭言之

秋公會劉子晉侯齊侯宋公衛侯鄭伯曹伯莒子邾子滕子薛伯杞伯小邾子于平丘

劉子王之中大夫也

八月甲戌同盟于平丘

何以再地平丘善之也自申之會楚子主中國晉不復合諸侯者八年楚遂滅陳與蔡肆行於天下諸侯莫敢與之爭蓋晉政已衰矣雖齊之疆猶且附楚及昭公立而為是會因以服齊返陳蔡之君劉子在焉蓋請於王而為之也於是齊聽命而陳吳蔡廬皆得復其國興滅國繼絕世而楚知中國

之有霸君子是以善之也

公不與盟

公何以不與盟邾莒愬公而不得盟也不得盟則何以不諱恥不足恥也邾莒不共晉而曰魯朝夕伐我我之不共魯故之以晉侯於是辭公子服惠伯曰君信蠻夷之訴以絕兄弟之國弃周公之後寡君聞命矣君子以是為不恥也

晉人執季孫意如以歸

辭公非矣又執意如非伯討也故以人執

公至自會蔡侯廬歸于蔡陳侯吳歸于陳

此蔡世子陳世子也何以曰蔡侯陳侯諸侯請於

王而復之則君也何以不言復歸舊位已絕也君

之則何以名復國之辭也內無君則何以復國之

辭言之陳蔡已滅矣不名則無以別其為廬與吳

也其言歸順辭也以王命復則其道為順也

冬十月葬蔡靈公公如晉至河乃復吳滅州來

州來國也何以知其為國邑不言滅外取邑有見

則繫之國非有見則不書也

十有四年春意如至自晉

意如何以不氏一事而再見者卒名之也

三月曹伯滕卒夏四月秋葬曹武公八月莒子去疾

卒冬莒殺其公子意恢

三百八十四  
意恢莒諸公子也何以不曰大夫非大夫也曷爲以國殺莒郊公立不感其父之喪善意恢而惡公子鐸鐸於是與蒲餘侯謀殺意恢而出郊公意恢之死郊公之爲也

十有五年春王正月吳子夷末卒二月癸酉有事於武宮籥入叔弓卒去樂卒事

叔弓卒何以言有事於武宮籥入泣事而卒也君在祭樂之中大夫卒不以告泣事而卒事之變也大夫卒廢繹不廢祭以大夫爲重而廢祭則忘尊以宗廟爲重而不去樂則忘恩去樂卒事變之正也君子與焉葉子曰吾何以知在祭樂之中大夫卒不以告歟昔者衛有大史曰柳莊寢疾衛侯以爲社稷之臣曰若革疾雖當祭必告則當祭大夫卒不告當祭而告者以柳莊爲之也

夏蔡朝吳出奔鄭

朝吳蔡大夫之三命者也

六月丁巳朔日有食之秋晉荀吳帥師伐鮮虞冬公如晉

十有六年春齊侯伐徐楚子誘戎蠻子殺之

楚子戎蠻子何以不名兩夷狄之辭也以楚子爲夷狄則誘殺不足誅以戎蠻子爲夷狄則死不以正不足治所以絕於中國也

夏公至自晉秋八月己亥晉侯夷卒九月大雩季孫意如如晉冬十月葬晉昭公

十有七年春小邾子來朝夏六月甲戌朔日有食之秋邾子來朝八月晉荀吳帥師滅陸渾之戎

陸渾之戎公羊穀梁作戎左氏作之戎當從左氏不正其詐周也晉欲伐戎而請於周曰欲有事於

雒與三塗遂涉自棘津以滅陸渾是以謂之詐周故辭間容之之緩辭也不與其正之辭也

冬有星孛于大辰記異也大辰大火也言孛之在大火也楚人及吳戰于長岸

吳伐楚令尹陽句卜戰不吉公子魴以上流欲戰故以楚及吳言楚之主戰也何以不言師敗績兩


夷狄之辭也十有八年春王三月曹伯須卒夏五月壬午宋衛陳鄭災

外災不書此何以書宋陳所志也衛鄭以同日為異也

六月邾子入郟秋葬曹平公冬許遷于白羽

十有九年春宋公伐邾夏五月戊辰許世子止弒其君買

止非弒而言弒因其志以見正也古者醫不三世



不服其藥君有疾飲藥臣先嘗之親有疾飲藥子先嘗之止之不嘗藥既自以為罪矣是以因其志而正之也葉子曰趙盾與止皆加之弒者也而春秋之義不同趙盾加弒治之者也治之者所以戒天下之為人臣者也許止加弒與之者也與之者所以勸天下之為人子者也何以知許止之為與也董狐書盾弒盾始曰天乎無罪孰為盾而忍弒其君者乎則盾未知其過者也未知其過而不治則凡為人臣者皆得以自免故加之以弒使天下後世知有如盾者皆當與弒等故曰所以戒也許悼公死止曰我與夫弒者不立乎其位以與其弟斯哭泣齧飢粥嗑不容粒未踰年而死則國人不以弒責止而止自責其志宜可與也故從而加之弒者使天下後世有如止者亦不敢自逃乎弒故曰所以勸也此悼公所以得葬於後如是而為人子之道盡矣故以許止一見法焉

己卯地震秋齊高發帥師伐莒

高發齊大夫之三命者也

冬葬許悼公

二十年春王正月夏曹公孫會自鄭出奔宋

公孫會曹大夫之三命者也奔未有言自者此何以言自強也鄭會之邑也會有罪曹人將治之不

服而走其邑曹人迫之然後出奔其固自絕於曹  
也可言自鄭奔不可言自曹奔葉子曰臧武仲據  
防求後於魯而後奔邾孔子曰雖曰不要君吾不  
信也武仲以求後而據防且不可會不服罪而走  
鄭其能免於春秋歟

秋盜殺衛侯之兄縶

縶公羊穀梁作輒左氏作縶當從左氏春秋不以  
疾名人縶靈公之庶兄也其不立非疾也盜微者  
也有國不能保其兄而使微者得以殺之以靈公  
為不能弟也故目兄

冬十月宋華亥向寧華定出奔陳十有一月辛卯蔡  
侯廬卒

二十有一年春王三月葬蔡平公夏晉侯使士鞅來  
聘宋華亥向寧華定自陳入於宋南里以叛

向寧宋大夫之三命者也南里國中之南也叛者  
叛於楚也

秋七月壬午朔日有食之八月乙亥叔輒卒冬蔡侯  
朱出奔楚公如晉至河乃復

二十二年春齊侯伐莒宋華亥向寧華定自宋南里  
出奔楚大蒐于昌閭夏四月乙丑天王崩六月叔鞅  
如京師

叔鞅吾大夫之三命者也



葬景王

葬天王不書此何以書不正其無故以大夫會葬也

王室亂

王室者何內也亂者何大夫爭立君也大夫爭立君則何以言王室亂亂自內作非有亂之者也葉子曰厲王言天下蕩蕩無綱紀文章而其詩曰枝葉未有害本實先撥故序詩者以為周室大壞幽王言西戎東夷交侵中國而其詩曰萑之華芸其黃矣故序詩者以為閔周室之將亡王室之為言固天下之所本猶枝葉之有幹也然王子帶之難襄王出居于鄭而不言亂襄王猶在也乃景王崩敬王未立周蓋未有君君之廢置唯劉單尹召毛五子之所為雖有王猛之正而不得立則天下何適以聽命此君子所以志其亂歟

劉子單子以王猛居于皇

王猛穆后之子太子壽之母弟也君薨稱子繫名王猛何以不言子與之以王而正其所得立也其曰以居于皇者何制在劉子單子也君者受顧命於先王而臣之所宜奉之者也立君而制於臣非立之道也皇畿內之邑言居則猛之所宜有也葉子曰吾何以知猛之為正而得立歟猛太子之母

弟而幼也朝庶子而長也魯襄公無嫡立敬歸之子野而卒季氏欲立敬歸之弟齊歸之子稠穆叔曰不可大子死有母弟則立之謂稠雖敬歸弟之子而非嫡則不宜立也楚平王無嫡子西為庶長昭王雖以為大子而子常欲立子西曰大子壬弱其母非嫡也子西長立長則順謂子西與昭王皆非嫡而子西長則宜立也齊桓公以公子昭屬宋襄公桓公死齊人立武孟宋襄公伐齊納公子昭而春秋不與焉晉人以趙盾納捷菑于邾邾人以麇且捷菑皆庶子而麇且長趙盾不克納而春秋與焉夫必大子之母弟而後可以繼大子則猛為

壽之母弟所得立者也必無嫡而後可以立庶長則猛雖在朝長所不得立也而朝之言曰王后無嫡則立長是謂大子為嫡而欲以長奪猛夫安知大子母弟亦嫡哉此固朝之所以絕於春秋也秋劉子單子以王猛入于王城

王城西都郊廓也其言入何難也朝猶在焉然則天子亦有難於天下乎不難則無以正朝之罪也故王猛入于王城言入天王入于成周言入冬十月王子猛卒

曰王猛矣何以復言王子猛正終之辭也何以不言崩未踰年之王也葉子曰三家言猛事皆不同

學者疑焉公羊穀梁皆謂猛為不得立不知其事而以春秋書入意之也左氏知其事矣而不能明其所得立王子朝賓起有寵於景王劉伯益惡賓起之為人而欲殺之惡朝之言以為亂而欲去之是猛為大子已定于景王而朝以寵欲奪之也及景王崩劉單見王猛殺賓起而盟羣公子則猛固已即喪次之位而見羣臣矣故後諡之曰悼公然而春秋不書焉者不正其未踰年而得稱王也敬王猛之母弟亦立於劉單春秋正名之曰天王使者見卑者以不正者見正者王子帶之亂見襄王不見子帶襄王尊也今猛與朝更為出入自猛居皇至于卒見猛不見朝則猛亦尊也朝書尹氏立而敬王立不書敬王正也今猛立亦不書與敬王同盟亦正也惟尊且正則天下皆其所得居矣故襄王書居于鄭敬王書居于狄泉猛亦書居于皇其辭一施之則猛之得立其事與義固已具之矣豈三家未之思歟

十有二月癸酉朔日有食之

二十有三年春王正月叔孫婁如晉癸丑叔鞅卒晉人執我行人叔孫婁

婁以晉討邾人之愬使于晉晉侯執之使與邾大

夫坐媿不從乃以其介當之而館媿於箕非伯討也故以人執

晉人圍郊

郊朝之邑也邑不言圍此何以言圍以朝在焉圍郊所以圍朝也朝始作亂蓋以郊要餞三邑之甲逐劉子焉晉以籍談荀躒之師納王何以書人貶也納王而使大夫非勤王之道也

夏六月蔡侯東國卒于楚秋七月莒子庚輿來奔戊辰吳敗頓胡沈蔡陳許之師于雞父胡子髡沈子逞滅獲陳夏齧

夏齧陳大夫之三命者也此救州來之師也何以直言敗公子光之詐戰也楚以六國之師救州來令尹子瑕卒而楚師燿光以遠越攝將賤而多寵政令不一七國同役不同心乃請先犯胡沈陳以奔楚師詐之也六國之師何以不累數夷狄之辭也胡子髡沈子逞何以言滅死也陳夏齧何以言獲生得也凡君死於位曰滅生得曰獲大夫生死皆曰獲滅國我滅之故文在上君死自滅也故文在下

天王居于狄泉

天王敬王也敬王猛之母弟所得立者也未三年則何以稱王曠年不可以無君踰年而稱者臣子

之辭也

尹氏立王子朝

王子朝何以書立不正其立也其言尹氏立者何見世卿也朝始敗而奔尹尹圍誘劉佗殺之敬王如劉尹辛復敗劉師而取西闈遂以立朝則立朝者尹氏非一人也是已王矣其猶曰王子朝者何不正其立則不與其得王稱也是猶王子朝云爾八月乙未地震冬公如晉至河有疾乃復

復未有言疾者此何以言有疾見外此皆無疾也二十有四年春王二月丙戌仲孫矍卒姞至自晉姞何以不氏一事而再見者卒名之也

夏五月乙未朔日有食之秋八月大雩丁酉祀伯郁釐卒冬吳滅巢

巢國也

葬杞平公

二十有五年春叔孫婞如宋夏叔詣會晉趙鞅宋樂大心衛北宮喜鄭游吉曹人邾人滕人薛人小邾人于黃父

叔詣吾大夫之三命者也趙鞅樂大心北宮喜游吉晉宋衛鄭大夫之三命者也此謀王室也敬王在狄泉趙鞅合諸侯之大夫輸王粟具戍人曰明年將納王葉子曰天子蒙塵諸侯奔走以問官守




禮也今周之無王四年矣而朝猶在此諸侯所宜  
 奔走以共獎王室而討罪人也晉為盟主雖能合  
 諸侯而不親會卒無所効其力而春秋之辭不加  
 貶何也古者能齊家然後能正其國能正國然後  
 能正天下今王室釁起於父子而禍成於兄弟春  
 秋既書曰王室亂見其治家者如此固不足以正  
 國則何以責諸侯之不能正乎易曰父父子子兄  
 兄弟弟夫夫婦婦而家道正正家而天下定矣君  
 子以為使諸侯而至是者周實有以召之故緩諸  
 侯而急王室蓋將使有天下者得以自反也故於  
 黃父一見法焉

有鸛鵒來巢

記異也鸛鵒非中國之禽宜穴而巢也葉子曰天  
 有時地有氣橘踰淮而北為枳鸛鵒不踰濟貉踰  
 汶則死地氣也天有時而生有時而殺草木有時  
 以生有時以死石有時以泐水有時以凝山有時  
 以澤天時也天反時為災地反物為妖故天失其  
 時則書實霜殺菽實霜不殺草李梅實地失其氣  
 則書鸛鵒來巢

秋七月上辛大雩季辛又雩

雩而得雨則書雩既雩矣何以又雩非請雨也欲  
 聚眾以逐季氏也



九月己亥公孫于齊次于陽州

奔也內不言奔若曰不有其地而自去云爾陽州齊地次于陽州待命于齊也

齊侯唁公于野井

唁弔也弔死曰弔弔生曰唁

冬十月戊辰叔孫婁卒十有一月己亥宋公佐卒于

曲棘

曲棘宋地何以書非正也

十有二月齊侯取鄆

鄆魯鄆也外取內邑不書此何以書欲居公也公不能自有其地而齊取之以居公爲公者病矣其挈齊侯者不能納公而徒取其地以居之非諸侯之道也

二十有六年春王正月葬宋元公

公已出矣孰葬之以公命葬之也以公命葬者猶以爲有公也葉子曰昭公旣出魯之政盡在季氏矣然春秋交諸侯之事未嘗不書而王室與諸侯所當告者亦未嘗不赴蓋季氏避逐君之名而以公自出告於諸侯凡國之事皆以公命行之而王室諸侯亦不以魯爲無君而不赴故春秋所書與常法一施之將以見季氏雖有無君之心而不敢不畏於名王室諸侯亦不以季氏而亡公則公固

非季氏之所能絕也

石林先生春秋傳卷第十八

後學 成德 校訂

石林先生春秋傳卷第十九

葉氏

昭公三

三月公至自齊居于鄆

公既失守其宗廟矣何以書至春秋之辭也公雖居外而義不敢以外公故猶以在國之禮書之也夏公圍成

成孟氏之邑邑不言圍此何以言圍以公之不能得成也附於季氏齊侯謀納公梁丘據取申豐之貨請先卜於成故公以齊師伐成而不能克公既失國而假人之師以伐私邑故挈公焉病公也



秋公會齊侯莒子邾子杞伯盟于鄆陵

謀納公也邾莒魯之怨杞伯不能自立久矣而何盟焉者著齊志也

公至自會居于鄆九月庚申楚子居卒冬十月天王入于成周

成周東周也

尹氏召伯毛伯以王子朝奔楚

三子與朝皆王之大夫也何以不言出周非大夫所得同出也故與王子瑕之辭一施之何以知其齊自周出也王猛卒于王城而尹氏立朝王城亦王國也以別於成周爾及敬王入於成周而三子

以朝奔楚則其出固自周也葉子曰或曰禮天子不言出朝嘗立而君矣為其以不正非所得君也故春秋奪之不得與天王同辭是豈瑕之比歟非也君朝者誰乎尹氏也春秋固未嘗與之夫不見與於春秋何君之云是亦周之大夫爾天子不言出非先君子之言也吾固論之矣

二十有七年春公如齊公至自齊居于鄆夏四月吳弒其君僚

稱國以弒衆弒君之辭也此闔廬之弒也何以言衆僚以篡立衆之所弃也

楚殺其大夫卻宛

卻宛楚大夫之三命者也宛暱費無極之讒而求說於令尹囊瓦以其藏甲取賂譖之囊瓦信費氏讒而殺宛盡滅卻氏族黨卻宛之死罪累上也故以國殺

秋晉士鞅宋樂祁犁衛北宮喜曹人邾人滕人會于扈

樂祁犁宋大夫之三命者也此謀納公也鄆陵之盟合三國而後不果今晉復合諸侯之大夫而士鞅取貨於季氏脅宋衛亦無成然辭無所貶以公不能於季氏則未可責諸侯大夫之不能復公也葉子曰黃父之會大夫不貶所以正天子而有天下者也扈之會大夫不貶所以正諸侯而有一國者也

冬十月曹伯午卒邾快來奔快邾大夫之三命者也公如齊公至自齊居于鄆

二十有八年春王三月葬曹悼公公如晉次于乾侯乾侯晉地也次于乾侯待命于晉也公既不得於齊因扈之會故改而求之晉見公不得其所也

夏四月丙戌鄭伯寧卒六月葬鄭定公秋七月癸巳滕子寧卒冬葬滕悼公

二十有九年春公至自乾侯居于鄆齊侯使高張來



言公

高張齊大夫之三命者也齊侯嘗言公矣此何以復言公以公求晉而不獲也非徒吾不能納晉亦不能納爾齊侯於是稱主君子家子曰齊卑君矣君祇辱焉公於是復如乾侯

公如晉次于乾侯夏四月庚子叔詣卒秋七月冬十月鄆潰

內未有言潰者此何以言潰見公之失民也始公出齊國人如釋重負公之居鄆齊侯命之鄆人未必欲也故公舍齊而適晉鄆人遂潰

三十年春王正月公在乾侯

鄆潰故公留于乾侯中國不言在言在存公也

夏六月庚辰晉侯去疾卒秋八月葬晉頃公冬十有

二月吳滅徐徐子章羽奔楚

滅國不名內無君也徐子何以名賤之也吳子始伐徐防山而水其城徐子斷髮攜其妻子以逆吳子吳子為言而送之使邇臣迫其後徐子乃奔以徐子為求服不獲而奔也

三十有一年春王正月公在乾侯季孫意如會晉荀躒于適歷

荀躒晉大夫之三命者也謀納公也意如身為惡晉欲納公而意如何謀焉著晉志也

夏四月丁巳薛伯穀卒晉侯使荀躒唁公于乾侯  
 晉侯嘗謀納公矣何以復唁公以季氏為不欲也  
 葉子曰齊晉皆無意於納公者也夫諸侯失位自  
 非得罪於其國而不能容則必有與之爭國而篡  
 奪或權臣擅命而迫逐之也上無天子下無方伯  
 既無以討其罪則諸侯力能正之則正之者義安  
 得而不為乎故春秋凡納君而得其正者未嘗不  
 與也頓子迫於陳而出奔楚人圍陳而納之春秋  
 雖夷狄楚然猶書納頓子于頓蓋善之以勸諸侯  
 之義也方昭公之時見逐於季氏苟明君臣之義  
 者孰不欲加誅於意如而大國先於齊晉晉為霸

主尤諸侯之所服而聽命者也使果有意於納公  
 一興師而季氏無不服矣而公徬徨於陽州乾侯  
 之間者八年齊一為鄆陵之盟而謀之於其怨與  
 弱國晉一為適歷之會而謀之於其罪人中間雖  
 晉合五國以會於扈而齊不與士鞅卒取魯貨而  
 無成功晉侯不以為過也有意如不能問而徒取  
 鄆圍成寄公於乾侯此豈其志哉故齊徒能使高  
 張來唁其不得見於晉晉徒能使荀躒來唁其不  
 得入於魯不知其責皆在於已而莫之為也故春  
 秋據其實而書之未嘗加之辭亦以為不待貶絕  
 而自見者非特發齊魯之隱使不得欺於當時見

昭公之暗且懦墮二國之計往來迭求至死而弗悟雖無季氏固未可保其國者也

秋葬薛獻公冬黑肱以濫來奔

黑肱者何濫之黑肱也何以不言濫邾之別子非受封於天子者也

十有二月辛亥朔日有食之

二十有二年春王正月公在乾侯取闕

闕內邑也魯羣公墓之所在孰取之公取之也公在乾侯則何以取闕公以乾侯為不得其所故欲託於先公之墓以居也內邑則曷為謂之取以公不能自有其地猶取之外

夏吳伐越秋七月冬仲孫何忌會晉韓不信齊高張宋仲幾衛世叔申鄭國參曹人莒人薛人杞人小邾人城成周

仲孫何忌吾大夫之三命者也韓不信仲幾世叔申國參晉宋衛鄭大夫之三命者也天子之都而諸侯城之正也諸侯不自城而使大夫城非正也何以無貶辭以大夫有勤王之心不可貶也大封天子合眾之禮也古者天子無城成周而城天王固已病矣諸侯無封城成周諸侯固已違矣然而王室亂天子不能城諸侯而不能共其事大夫而不能共其役變之正也雖欲加之辭不可也何以不

言京師宗周亦京師也葉子曰天下有道守在四夷域民不以封疆之界固國不以山谿之險王室烏在城而後固與歲十一月土功興司徒詔民司空詔事雖宮室溝洫道路之政皆在王而有城未有壞而至於脩也王畿之內凡徒役之政家一人歲三日功築不煩而民無所困其力城而有役未有勤民於民也然不幸而至於城諸侯不能共其事大夫不能共其役夫誰與王立者故義所可城城邢雖諸侯猶可況天子乎城楚丘雖遷而城猶可況不遷乎吾是以知其為變之正而通乎大夫之城者春秋之義也乃天王之病則自若矣

十有二月己未公薨于乾侯

定公一

元年春王

何以不書正月元年正月所以正始也定之立不以正則其始不得為正也定公昭公之弟也昭公薨季孫意如廢大子公衍而立定公定公蓋受國於季氏非受國於昭公也國不受於先君而受於權臣非正也大子不得位而弟得位亦非正也元年者定公之年也定公以六月即位而得稱元年稱年者不以月元可與也月者元年之月也可以其始稱元不可以其始稱正正不可與也葉子曰

舜避堯之子三年然後踐天子位方其格文祖曰  
 月正而不言正月未踐位則不可言正月也武王  
 伐紂二月而後克方其渡孟津曰一月而不言正  
 月其未克紂則不可言正月也夫正之不可易如  
 此雖舜之未得位武王之未得國且猶不敢稱而  
 況於定公乎如是而後知天子諸侯不可輕以其  
 位與人人亦不可輕受其位於天子諸侯雖有大  
 臣亦不可以其權而輕予奪其君故以定公一見  
 法焉

三月晉人執宋仲幾于京師

此大夫之執也何以與霸主之辭一施之以霸主  
 之令執也以霸主之令而執則何以言晉人役在  
 王都仲幾不受功而執之不以歸之天子而歸霸  
 主三月而後返諸京師非伯討也故以人執  
 夏六月癸亥公之喪至自乾侯  
 公薨于乾侯非正也故辭間容之之緩辭也不與  
 其正之辭也

戊辰公即位

諸侯薨五日而殯正棺乎兩楹之間而後即位者  
 喪次之嗣位也不書踰年以其正月朔即位者朝  
 廟之君位也書而不日昭公薨至是踰年矣不嫌  
 於一年二君則不必待踰年而即君位自癸亥至

戊辰歷五日殯之節也曠年不可以無君則以喪次之嗣位遂正朝廟之君位者變之正也故特書日

秋七月癸巳葬我君昭公九月大雩立煬宮

煬宮者何煬公之宮也煬公伯禽之子廟已毀矣毀而復立非禮也

冬十月隕霜殺菽

記異且災也建酉之月而隕霜固異矣又殺菽焉不言草殺草不為災也

二年春王正月夏五月壬辰雉門及兩觀災

以雉門及兩觀災自雉門始也禮天子有兩觀諸侯有臺門魯何以有兩觀周公之賜也

秋楚人伐吳冬十月新作雉門及兩觀

何以言新作有加其度也禮天子之門制路門不容乘車之五个應門二徹三个魯雖得有庫門雉門以天子臯門應門而為之也新作雉門及兩觀豈有因災而僭天子者歟故與南門之辭一施之子家駒言魯僭天子之禮曰設兩觀設之為言有為為之也

三年春王正月公如晉至河乃復二月辛卯邾子穿卒夏四月秋葬邾莊公冬仲孫何忌及邾子盟于拔四年春王二月癸巳陳侯吳卒三月公會劉子晉侯



宋公蔡侯衛侯陳子鄭伯許男曹伯莒子邾子頓子  
胡子滕子薛伯杞伯小邾子齊國夏于召陵侵楚夏  
四月庚辰蔡公孫姓帥師滅沈以沈子嘉歸殺之  
公孫姓蔡大夫之三命者也沈楚之與國也故晉  
以不會召陵而討焉然以蔡怨楚因使伐沈蔡遂  
滅沈而殺其君非道也是以沈子先名而後言殺  
之之緩辭也不與其正之辭也

五月公及諸侯盟于臯鼬

諸侯何以不序不足序也楚囊瓦有美裘之怨於  
蔡侯止蔡侯於南郢不歸者三年晉以蔡侯之請  
合十八國之諸侯會于召陵以侵楚天子以王臣  
臨之荀寅求貨於蔡侯弗得而辭諸侯固已失矣  
故公再合諸侯而為此盟後亦無聞焉蔡侯於是  
求於吳而吳入郢中國無能為而後夷狄得以致  
其功以諸侯為不足序也

杞伯成卒于會六月葬陳惠公許遷于容城秋七月  
公至自會劉卷卒

劉卷者何劉子也外大夫不卒此何以卒嘗主會  
以臨我天子為之赴而我喪之也何以不言爵衰  
內諸侯不言爵不得以爵見也

葬杞悼公楚人圍蔡晉士鞅衛孔圉帥師伐鮮虞  
孔圉衛大夫之三命者也

葬劉文公

卷何以稱公主人之辭也古者卿六命賜官故卿  
 得臣其邑大夫不得臣其邑得臣其邑則言公不  
 得臣其邑則言主公者君也故曰大夫不稱君  
 冬十有一月庚午蔡侯以吳子及楚人戰于柏舉楚  
 師敗績

蔡以楚圍請救於吳吳子為之興師故以蔡侯吳  
 子及楚人言蔡之主戰也吳何以稱子進之也召  
 陵之會臯鼬之盟諸侯既無能為吳子能為之出  
 師一戰而復楚讎則中國之不若也其曰蔡侯以  
 吳子何言吳子之為蔡用也此楚囊瓦之師也何  
 以稱楚人敗而人之曰是拘蔡侯者也

楚囊瓦出奔鄭

囊瓦楚大夫之三命者也

庚辰吳入郢

吳何以復稱國夷狄之也吳既入郢以班處于楚  
 王之宮君居其君之寢而妻其君之妻大夫居其  
 大夫之寢而妻其大夫之妻蓋有欲妻楚王之母  
 者也何以不言楚既狄之矣不使得與諸侯入國  
 之辭同故不以楚與之是入郢而已

五年春王三月辛亥朔日有食之夏歸粟于蔡  
 孰歸之我歸之也我何以歸粟於蔡蔡圍於楚而

三十一  
世末  
饑諸侯相與共歸之也諸侯歸之則何以獨言我  
救災恤患諸侯之道人得自爲者也

於越入吳

於越者何越之自名者又名從主人

六月丙申季孫意如卒

葉子曰學者言春秋內大夫弑君皆貶不書卒是  
以公子翬不書卒仲遂卒有爲而書之也故以意  
如書卒爲正其爲定公之大夫以見定公不討賊  
而賞私勞吾以爲不然弑君之賊以爲君貶之而  
不卒邪則桓公與翬同惡者也桓公旣以弑立而  
進翬爲三命稱公子其爲大夫可知矣安有生以

爲大夫而死反追其罪不以大夫卒之乎以爲春  
秋貶之而不卒邪則翬進三命之大夫尚不以進  
桓而書卒意如之爲大夫當從先君而不革乃反  
責之爲大夫而卒之乎二義皆無當春秋不輕以  
弑加人昭公雖以意如逐君而死於外正以爲弑  
則春秋宜有別矣楚公子比從弃疾之立靈王縊  
而死以公子比主弑蓋靈公之死由比也今昭公  
不以逐而死不得其正謂意如爲弑可乎然則翬  
弑而春秋無貶文以桓公主弑也遂弑而春秋無  
貶文以宣公主弑也貶翬遂則桓宣得以免矣意  
如之罪異於二人春秋於昭公書季孫意如固不

待貶絕而自見稔其惡定公而不書正月所以誅  
意如者已盡而定公終身不得為正其貶之亦孰  
大於是則治定公與意如者不在其卒意如也  
秋七月壬子叔孫不敢卒

叔孫不敢吾大夫之三命者也

冬晉士鞅帥師圍鮮虞

六年春王正月癸亥鄭游速帥師滅許以許男斯歸  
游速鄭大夫之三命者也

二月公侵鄭公至自侵鄭公季孫斯仲孫何忌如晉  
季孫斯吾大夫之三命者也使舉上客季孫斯仲  
孫何忌何以並見非使介也以二卿並出也聘則  
何以使二卿出非常聘也為陽虎請已也陽虎欲  
作亂謀殺三桓取魯國囚季孫斯獻鄭俘強使仲  
孫何忌報夫人之幣六之俱以為後圖於是何忌  
謂范鞅曰陽虎若不能居魯而息肩於晉所不以  
為中軍司馬者有如先君季孫斯蓋畏虎而不能  
止也

秋晉人執宋行人樂祁犁

祁犁使晉嘗主於范鞅及是趙簡子逆而飲之酒  
范氏趙氏方交惡范鞅怒以其私告於晉侯曰祁  
犁以君命越疆而使未致而私飲酒於趙氏不敬  
二君乃執之非伯討也故以人執

冬城中城

中城公宮之城也三家既張公懼於為亂故脩中城以備之不正其脅於疆臣而自固也

季孫斯仲孫忌帥師圍鄆

鄆內邑也不言圍此何以言圍以公之不能得鄆也其事則史失之矣其曰仲孫忌者何仲孫何忌也不曰何忌闕文也

七年春王正月夏四月秋齊侯鄭伯盟于鹹齊人執衛行人北宮結以侵衛

北宮結衛大夫之三命者也鹹之會齊侯召衛侯衛侯欲叛晉而事齊諸大夫不可衛侯乃使北宮

結使齊私齊侯曰執結以侵我大夫則從矣齊侯

於是執結以侵衛非伯討也故以人執

齊侯衛侯盟于沙大雩齊國夏帥師伐我西鄙

國夏齊大夫之三命者也

九月大雩冬十月

八年春王正月公侵齊公至自侵齊二月公侵齊三

月公至自侵齊曹伯露卒夏齊國夏帥師伐我西鄙

公會晉師于瓦公至自瓦秋七月戊辰陳侯柳卒晉

士鞅帥師侵鄭遂侵衛葬曹靖公九月葬陳懷公季

孫斯仲孫何忌帥師侵衛冬衛侯鄭伯盟于曲濮從

祀先公

從者何順也古者謂從為順橫為逆先公者何閔  
 公也孰祀之陽虎也文公躋僖公以先閔公魯人  
 以為逆祀陽虎欲去三桓而代之故順祀閔公僖  
 公以求說於魯人何以不言陽虎不與陽虎得主  
 宗廟也禘則何以謂之祀禘非陽虎之所得為也  
 閔公則何以謂之先公閔公非陽虎之所得正也  
 是非為宗廟之禮者曰從祀先公云爾

盜竊寶玉大弓

寶玉大弓者何夏后氏之璜封父之繁弱魯之分  
 器也古者天子分寶玉于同姓之邦時庸展親諸  
 侯分守之以為寶焉盜者何陽虎也陽虎何以謂

之盜取非其有也陽虎欲誅季氏不克故如公宮  
 取寶玉大弓以奔齊何以書天子之命器也

九年春王正月夏四月戊申鄭伯薑卒得寶玉大弓  
 得者何不求而獲也惡得之陽虎歸諸堤下而得  
 之也何以不目堤下大寶玉大弓也失之書得之  
 書所以為重者不在地也

六月葬鄭獻公秋齊侯衛侯次于五氏秦伯卒冬葬  
 秦哀公

十年春王三月及齊平夏公會齊侯于夾谷公至自  
 夾谷晉趙鞅帥師圍衛齊人來歸鄆謹龜陰田  
 鄆前見圍蓋叛而附齊矣謹陽虎之邑虎挾之以

入齊龜陰龜山之陰也三田皆齊之所侵既與我  
 故會而復歸之何以書善公之有以得齊也葉子  
 曰三田之歸左氏穀梁皆謂孔子相夾谷之會退  
 萊兵而齊人以謝過非也夾谷之事匹夫之勇智  
 者所不為而謂孔子為之乎始齊以國夏帥師伐  
 我我報而侵之者再自是遂不復交兵及陽虎叛  
 而奔齊請師以伐曰三加必取之齊侯以鮑國之  
 言而止遂執陽虎是時晉政已衰平公不能主諸  
 侯故公德齊叛晉而與之平則齊魯固相與為好  
 矣是以夾谷會而不盟使齊果有意於得魯則方  
 陽虎之奔因之可以乘其間何舍是不為而反僥

倖一旦之勝乎孔子在齊十餘年景公欲以尼谿  
 田封之晏子止焉齊大夫蓋有欲害孔子者則齊  
 之君臣固不足以知孔子使其知之必不肯以裔  
 夷之俘行其詐使其不知則何畏乎一言而為之  
 退乎公羊曰孔子行乎季孫三月不違齊人為是  
 來歸之吾以此言為猶近孔子之用於魯蓋未嘗  
 得盡行其志也使孔子而得盡行其志其為魯者  
 必有道矣何必危其身以要人之所不可必其曰  
 歷階而上不盡一等而視歸乎齊侯與夫優施手  
 足異門而出者皆戰國刺客假之以藉口如言曹  
 沫者曹沫之事尚不足信而況於孔子二氏不能

辨蓋欲尊孔子而反卑之也

叔孫州仇仲孫何忌帥師圍郕

叔孫州仇吾大夫之三命者也郕叔孫氏之邑也

邑不言圍此何以言圍以公之不能正郕也叔孫

成子初欲立武叔公若藐固諫不可武叔立以公

若為郕宰而使侯犯殺之弗能其圍人殺公若侯

犯以郕叛於齊有叔孫氏之疆而後南蒯得以肆

其惡以國為有政焉則不至於是也

秋叔孫州仇仲孫何忌帥師圍郕宋樂大心出奔曹

宋公子地出奔陳

公子地宋大夫之三命者也

冬齊侯衛侯鄭游速會于安甫叔孫州仇如齊宋公

之弟辰暨仲佗石彊出奔陳

辰景公之母弟也仲佗石彊宋大夫之三命者也

暨強也景公嬖桓魋而與其母兄公子地爭辰教

地使出奔避公以為禮而公弗止辰為之請而公

弗聽辰曰是我欺其兄也乃強仲佗石彊奔陳以

要公以景公為不能兄也故目弟

十有一年春宋公之弟辰及仲佗石彊公子地自陳

入于蕭以叛

蕭宋邑也辰自陳入于蕭將以正桓魋也仲佗石

彊與公子地從辰入蕭則非強也故言及何以言



一叛要君也其猶以弟目之宋公之為也

夏四月秋宋樂大心自曹入于蕭

何以不言叛從叛人則叛可知矣

冬及鄭平叔還如鄭涖盟

叔還吾大夫之三命者也

十有二年春薛伯定卒夏葬薛襄公叔孫州仇帥師

墮郕

墮者何毀其城也葉子曰左氏言仲由為季氏宰

將墮三都然歟非也三家之強久矣昭公欲殺季

氏無以為之謀至於失國春秋未嘗與焉今仲由

陪臣而季氏之隸也夫安得墮其主邑而併二都

得以治之乎或以為孔子為政於魯而以命仲由

方是時三家猶彊孔子雖為司寇而未嘗得行其

志正使為之亦有道矣何至以家臣謀其主反使

不服而犯上此豈孔子之術哉以吾考之自陽虎

叛季孫氏叔孫氏皆屈於家臣故南蒯不得意於

意如則以費叛侯犯不得意於州仇則以郕叛墮

郕墮費二氏自為計而欲去其險爾是以郕帥師

主州仇費帥師主斯公山不狃叔孫輒帥費人襲

魯蓋懼二氏之討已而先之夫何有於仲由此亦

尊孔子而反卑之者也

石林先生春秋傳卷第十九

後學

成德

校訂

會齊侯盟于黃十有一月丙寅朔日有食之公至自  
 黃十有二月公圍成公至自圍成  
 內不書至此何以書至危公也成黨季氏以逐昭  
 公復結齊以救季氏卑公室而犯其君於二氏為  
 尤甚郈費各叛其主故二氏皆自為之謀矣成獨

石林先生春秋傳卷第二十

葉氏

定公二

衛公孟彊帥師伐曹

公孟彊衛大夫之三命者也

季孫斯仲孫何忌帥師墮費秋大雩冬十月癸亥公  
 會齊侯盟于黃十有一月丙寅朔日有食之公至自  
 黃十有二月公圍成公至自圍成

內不書至此何以書至危公也成黨季氏以逐昭  
 公復結齊以救季氏卑公室而犯其君於二氏為  
 尤甚郈費各叛其主故二氏皆自為之謀矣成獨

未嘗叛則墮成非季氏之欲也故公斂處父以為  
 無成是無孟氏子偽不知我將不墮公於是自圍  
 成家臣而叛其主固已彊矣陪臣而叛其君彊孰  
 甚焉以公為危矣內書至惟桓會戎于唐與此而  
 二蓋視之猶夷狄然

十有三年春齊侯衛侯次于垂葭夏築蛇淵囿  
 有鹿囿矣又築郎囿焉有郎囿矣又築蛇淵囿焉  
 大蒐于比蒲衛公孟彊帥師伐曹秋晉趙鞅入于晉  
 陽以叛

晉陽趙鞅之邑也荀寅士吉射謀作亂鞅據其邑  
 以逐君側之惡人焉此家邑也何以言入逆辭也  
 以其入之道為逆也何以謂之叛以地要君非君  
 命而擅興師則是叛者也

冬晉荀寅士吉射入于朝歌以叛  
 荀寅士吉射皆晉大夫之三命者也朝歌晉之邑  
 也

晉趙鞅歸于晉

荀寅士吉射奔則鞅釋兵而復其位矣此叛者也  
 何以言歸順辭也以其歸之道為順也葉子曰春  
 秋之責臣子可謂嚴矣昔者太甲立而不明伊尹  
 放諸桐三年復之孟子曰有伊尹之志則可無伊  
 尹之志則篡鬻拳諫楚子弗從臨之以兵懼而從

之鬻拳曰吾懼君以兵罪莫大焉遂自刎君子以爲愛君人臣之事君有不幸不得道其常如伊尹鬻拳者雖其志不失爲愛君然要不可爲天下法是故鞅之事雖逐寅吉射而晉少安不得爲不忠然據邑而有其地專兵而有其權亦不得爲晉之道君子將與之則亂臣賊子必有假之以劫其君不與之則惡人在君側而大臣不能正國終無與爲者也是以治其始則正之以名而書叛原其終則察之以情而書歸使逆順兩得其道而不相廢則涖經事者不失其宜遭變事者不失其權矣故以鞅一見法焉

薛弒其君比

稱國以弒者衆弒君之辭也其事則史失之矣十有四年春衛公叔戌來奔

公叔戌衛大夫之三命者也

衛趙陽出奔宋

趙陽衛大夫之三命者也

二月辛巳楚公子結陳公孫佗人帥師滅頓以頓子牂歸

公子結公孫佗人楚陳大夫之三命者也滅國未有言兩國之師者惡楚也楚嘗圍陳以納頓子矣今以陳愬而滅頓爲人而滅者甚於己之滅也

夏衛北宮結來奔五月於越敗吳于檇李吳子光卒公會齊侯衛侯于牽公至自會秋齊侯宋公會于洮天王使石尚來歸脤

石尚王之上士也脤祭肉也古者以脤膳之禮親兄弟之國腥曰脤熟曰膳前未有言歸脤者此何以書善王命也自王季子來王命不復加於魯矣見天子所存猶有祭與號也

衛世子蒯瞶出奔宋衛公孟彊出奔鄭宋公之弟辰自蕭來奔


見辰不見公子地仲佗石彊以景公為不可正而辰獨去之也故終以弟言之

大蒐于比蒲邾子來會公

來會會于比蒲也諸侯相見於郤地曰會蓋約信以命事焉蒐而會之非禮也會公云爾

城莒父及霄

秋而城畏晉也以莒父及霄小大之辭也葉子曰是歲無冬蓋定公至是而終矣定公之立以季氏故元年不書正月自二年而書正月不得已而與之正也然定公終不可以為正故於其終復去一時其始無正言其不得受之於王也其終無冬言其不得承之於天也桓公之罪大故絕其二時因其聘與朝而正焉定公之罪小故絕其一時其在



人者無所與責也則正其終而已

十有五年春王正月邾子來朝鼯鼠食郊牛牛死改

卜牛

不言所食食非一也不敬之道甚於食角也

二月辛丑楚子滅胡以胡子豹歸夏五月辛亥郊

五月何以郊五卜而從也五卜強也

壬申公薨于高寢

諸侯有大寢有小寢高寢非正也

鄭罕達帥師伐宋

罕達鄭大夫之三命者也

齊侯衛侯次于渠蔭邾子來奔喪

喪何以言奔急事也禮非天子父母之喪不奔見

星而行見星而舍日行百里謂之奔諸侯而奔喪

非禮也

秋七月壬申妣氏卒

哀公之妾母也何以不言夫人薨哀未成君未致

之為夫人也非夫人則何以書卒哀已君也

八月庚辰朔日有食之九月滕子來會葬丁巳葬我

君定公雨不克葬戊午日下昃乃克葬辛巳葬定妣

定妣者何未致之為夫人則繫之定也未致之為

夫人何以得繫之定哀公將致之則不以妾母葬

之也曾子嘗問於孔子曰並有喪如之何何先何

後子曰葬先輕而後重其奠也先重而後輕禮也定妣後公葬非禮也

冬城漆

不時也

哀公一

元年春王正月公即位楚子陳侯隨侯許男圍蔡麇鼠食郊牛改卜牛夏四月辛巳郊秋齊侯衛侯伐晉冬仲孫何忌帥師伐邾

二年春王二月季孫斯叔孫州仇仲孫何忌帥師伐邾取濶東田及沂西田癸巳叔孫州仇仲孫何忌及邾子盟于句繹

此伐邾三卿也何以不言季孫斯季氏疆也古者唯天子三公不與諸侯盟列國之卿當小國之君卑邾子而不與盟以季孫斯為僭也

夏四月丙子衛侯元卒滕子來朝晉趙鞅帥師納衛世子蒯瞶于戚

納者何與其納也君薨矣蒯瞶何以稱世子明正也輒不得受命於王父則蒯瞶之世其國者正也葉子曰左氏載蒯瞶使戲陽速殺南子之事然歟非也子路嘗問於孔子曰衛君待子而為政子將奚先子曰必也正名乎名不正則言不順推而下之至於民無所措手足使蒯瞶果欲殺南子則弑

母之賊也安有弑母之賊許之以繼世而謂之名正而言順乎是故夫子不為衛君子貢固知之矣蓋蒯瞶始以南子召宋朝聞宋人之歌而醜之其歸必有正南子者而南子愧焉故欲加之罪誣以殺己爾戲陽速附之者也左氏不能辨遂以為實公羊不知其事而妄意之乃以輒為受命於靈公而為不以父命辭王父命之說夫靈公卒南子欲立公子郢為太子以為君命郢辭曰亡人之子輒在靈公未嘗立輒也此亦左氏之言從公羊之說固不可以為訓以左氏為正則輒非靈公之所立亦安得為受命於王父乎

秋八月甲戌晉趙鞅帥師及鄭罕達帥師戰于鐵鄭師敗績

趙鞅以兵車之旆先陳而會鄭師故以趙鞅及罕達言鞅之主戰也

冬十月葬衛靈公十有一月蔡遷于州來蔡殺其大夫公子駟

公子駟蔡大夫之三命者也楚圍蔡以報柏舉之役蔡人辨男女以聽命楚使遷於江漢之間而還蔡以駟謀復請於吳以遷州來而不果吳人將襲之乃殺駟以說吳公子駟之死罪累上也故以國殺



三年春齊國夏衛石曼姑帥師圍戚

石曼姑衛大夫之三命者也此石曼姑之師也何以先齊國夏不使子加於父也何以不言衛戚不外戚於蒯瞶也

夏四月甲午地震五月辛卯桓宮僖宮災

桓宮僖宮桓公僖公之宮也曷為以諡舉之遠也遠則何以不毀三家之為也禮諸侯五廟自襄數之至成於太祖之廟為五三家皆出於桓及僖而始大是以存而不毀三家之私也何以不言及尊相敵也


季孫斯叔孫州仇帥師城啓陽

以夏而城畏晉也定公城中城矣又城莒父及霄城漆哀公城啓陽矣又城西郭城毗城邾瑕蓋莊宣二君而書城者各一隱桓文成四君而書城者各再至襄以來求於城者始亟襄一君而城者四魯未有如是數也及定哀之間而書城者七則定哀守其國者如是而已

宋樂髡帥師伐曹

樂髡宋大夫之三命者也

秋七月丙子季孫斯卒蔡人放其大夫公孫獵于吳公孫獵蔡大夫之三命者也以人放者放有罪之辭也州來之役以公子駟不即遷既殺駟以說吳



獵復放于吳皆有累於駟者其事則史失之矣  
冬十月癸卯秦伯卒叔孫州仇仲孫何忌帥師圍邾  
四年春王二月庚戌盜殺蔡侯申

盜賤者也何以不言弒其君賤者不得列於君臣  
也

蔡公孫辰出奔吳

公孫辰蔡大夫之三命者也

葬秦惠公宋人執小邾子

稱人以執非伯討也其事則史失之矣

夏蔡殺其大夫公孫姓公孫霍

公孫霍蔡大夫之三命者也蔡侯之弒春秋書盜

而左氏以為大夫公孫翩大夫不得言盜非是其

事史失之矣公孫辰與姓霍蓋盜黨蔡於是逐辰

而殺二人公孫姓公孫霍之死罪累上也故以國

殺

晉人執戎蠻子赤歸于楚

楚人圍蠻蠻氏潰出奔於晉楚人以師臨上雒索

於晉曰晉楚有盟好惡同之不然將通於少習以

聽命晉人於是執戎蠻子而歸於楚若京師然然

非伯討也故以人執赤何以名不返也

城西郭六月辛丑亳社災

亳社商社也古者天子必存亡國之社屋其上而

柴其下以為廟屏戒魯何得有亳社周公之賜也  
秋八月甲寅滕子結卒冬十有二月葬蔡昭公葬滕  
頃公

五年春城毗夏齊侯伐宋晉趙鞅帥師伐衛秋九月  
癸酉齊侯杵臼卒冬叔還如齊閏月葬齊景公

閏月不書此何以書著喪禮也以月計者數閏以  
年計者不數閏葬者計月不計年以景公葬為得  
節一見正也

六年春城邾瑕晉趙鞅帥師伐鮮虞吳伐陳夏齊國  
夏及高張來奔叔還會吳于柤秋七月庚寅楚子軫  
卒齊陽生入于齊

陽生齊景公之世子也何以言入逆辭也景公欲  
廢陽生而立荼陳乞不能爭既偽許之而立荼矣  
景公死陳乞復詐國人立陽生而弒荼陽生雖得  
立而立之道則逆也

齊陳乞弒其君荼

陳乞齊大夫之三命者也殺荼於駘者朱毛也曷  
為以陳乞主弒荼陳乞之所君也既召陽生則荼  
雖欲存而不可是以不嫌於免朱毛而陳乞之罪  
不可以不正春秋之義也

冬仲孫何忌帥師伐邾宋向巢帥師伐曹  
向巢宋大夫之三命者也

七年春宋皇瑗帥師侵鄭

皇瑗宋大夫之三命者也

晉魏曼多帥師侵衛

魏曼多晉大夫之三命者也

夏公會吳于鄆秋公伐邾八月己酉入邾以邾子益來

入邾者伐邾而入也何以不言公諱之也師入邾處其公宮與吳入郟之師何擇焉以公為一闔閭也

宋人圍曹冬鄭駟弘帥師救曹

駟弘鄭大夫之三命者也

八年春王正月宋公入曹以曹伯陽歸

此滅曹也何以不書滅惡宋公也曹文之昭也武王殺紂立武庚武庚叛復立微子於宋以代商後曰崇德象賢統承先王賓之弗臣曹伯雖失德然於宋未有罪也宋以向巢伐之固已過矣既又圍之歷三時而卒入焉虜曹伯歸而殺之遂以滅曹君子以宋為忘武王之德矣故書其始入不書其終滅不使曹得滅於宋也虢未滅而虞師晉師先書滅夏陽罪在滅者也曹已滅而宋公不書滅罪在滅之者也

吳伐我



何以不言鄙至於城下也初鄙人道吳師以克武  
 城遂自蠶室庚宗次於泗上微虎欲宵攻吳吳人  
 行成始為城下之盟而還以我為恥也不言  
 夏齊人取謹及闡

外取內邑不書此何以書賂也公前入邾固非道  
 矣至是猶未釋也邾齊之出將為之伐我焉故公  
 賂二邑以求免於是歸邾子益葉子曰謹闡之事  
 吾何以不證於左氏而證之穀梁歟陽生娶於季  
 氏非內女不書則有之矣而齊以季姬故來伐我  
 及我與齊平則不得見經也而皆不書且季魴  
 侯之罪使公治之而齊罷婚可矣公何罪而受伐

焉男女之別人倫之大也誠以有罪來討亦安可  
 以賂而復合又從而嬖之非人情也若曰以執邾  
 子而取邑釋邾子而歸邑則春秋之世所應有故  
 公羊亦云吾是以知穀梁之為近實也

歸邾子益于邾

諸侯虜而返未有言歸者此何以言歸與內也我  
 既與吳盟故釋邾子而返之其言歸何易辭也我  
 脅於吳而聽焉則其歸為易也

秋七月冬十有二月癸亥杞伯過卒齊人歸謹及闡  
 此其為賂也曷為歸之邾子歸也何以不言我其  
 與之恥其歸之恥不可以我見也

九年春王二月葬杞僖公宋皇瑗帥師取鄭師于雍丘

師未有言取者此何以言取不正其以詐乘人而盡獲之也雍丘宋邑也皇瑗圍鄭師每日遷舍壘合鄭師哭鄭罕達救之不克大敗宋於是取鄭師唯使能者無死以郊張與鄭羅歸則鄭之免者無幾矣

夏楚人伐陳秋宋公伐鄭冬十月

十年春王二月邾子益來奔公會吳伐齊三月戊戌齊侯陽生卒夏宋人伐鄭晉趙鞅帥師侵齊五月公至自伐齊葬齊悼公

葉子曰諸侯弒而以疾告春秋從而書卒見於左氏者三吾信其一不信其二吾豈苟然哉楚麋之弒見於圍之行事而慶封亦言之此吾之所信也鄭髡頑之弒吾既言之矣齊陽生之弒吾亦未知其說夫弒君之惡亦大矣自非亂臣賊子欲篡而爭國則必彊宗大家挾權專政而肆其虐今陽生左氏不言其故直曰赴于吳師而已未見陽生取弒於齊者也其赴於吳以為同好而告之邪則兵方交非以為好也將畏吳而求說邪吾既卒能敗之何懼而遽弒君乎吳子三日哭於軍門之外以為恤其災而哀之邪則宜不伐喪而返也將必自

海而伐之則何為而哭乎既無當於人情而齊未  
有討弑君之賊者春秋乃書葬則陽生固未嘗弑  
也姑以為從赴告則非春秋之法此吾之所不信  
者

衛公孟彊自齊歸于衛薛伯夷卒秋葬薛惠公冬楚  
公子結帥師伐陳吳救陳

十有一年春齊國書帥師伐我  
國書齊大夫之三命者也此猶吳之言伐我也冉  
求之師入齊軍孟孺子奔齊人從之遂涉泗冉求  
之師獲齊師甲首八十齊師乃宵遁則至於城下  
矣是非我之所恥也

夏陳轅頗出奔鄭

轅頗陳大夫之三命者也

五月公會吳伐齊甲戌齊國書帥師及吳戰于艾陵  
齊師敗績獲齊國書

公會吳伐齊齊人不服國書將中軍皆欲死戰故  
以國書及吳言齊之主戰也獲國書死於敵也

秋七月辛酉滕子虞母卒冬十有一月葬滕隱公衛  
世叔齊出奔宋

世叔齊衛大夫之三命者也

十有二年春用田賦

賦軍賦也古者自甸而上有軍賦成公作丘甲其

厲民固已甚矣用田賦則凡受田者皆有賦雖井猶不免焉用者何賦不以田用田而賦舉丘之賦而加之田非正也於是季孫肥使冉有訪於孔子子曰君子之行也度於禮施取其厚事舉其中斂從其薄如是則丘亦足矣若不度於禮而貪冒無厭則雖以田賦將又不足且季孫若欲行而法則周公之典在若欲苟而行又何訪焉弗聽子曰季氏富於周公而求也為之聚斂而附益之小子鳴鼓而攻之可也其是之謂歟

夏五月甲辰孟子卒

孟子者何昭公之夫人也何以不曰夫人昭公取於吳諱取同姓也古者取妻不取同姓買妾不知其姓則卜之所以別男女也諱取同姓則何以謂之孟子疑辭也若宋女然何以不言薨疑其為夫人則不可以言薨也葉子曰吾何以知孟子之為宋姓歟記曰魯春秋去夫人之姓曰吳其死曰孟子卒孟子云者魯人之辭也宋魯婚姻之國故因之以為稱春秋從而不革史也其書吳則義之云爾孔子所以為法受過焉是以陳司敗嘗問於孔子曰昭公知禮乎子曰知禮陳司敗曰君取於吳為同姓謂之吳孟子君而知禮孰不知禮子曰丘也幸苟有過人必知之



公會吳于橐臯秋公會衛侯宋皇瑗于鄆宋向巢帥師伐鄭冬十有二月螽

十有三年春鄭罕達帥師取宋師于岳

師未有言取者此何以言取不正其以詐乘人而盡獲之也岳宋鄭之隙地也鄭人城岳以處宋之叛族向巢伐而圍岳鄭罕達復圍之宋以桓黷救其師罕達徇其師曰得桓黷者有賞黷遁而歸鄭於是取宋師獲其二大夫以六邑為虛則宋之免者無幾矣

夏許男成卒公會晉侯及吳子于黃池

會未有言及者此何以言及會兩伯之辭也吳何

以謂之伯進吳子也吳子與晉會黃池晉侯問師故吳子曰天子有命周室卑弱貢獻莫入上帝鬼神而不可以告無姬姓之振也今君將不長弟以力征於一二兄弟之國孤欲守先君之班爵用親聽會晉侯以其僭王稱使復命曰周室既卑諸侯失禮於天子孤以下無所逃罪今君掩王東海以淫名聞夫命圭有命固曰吳伯不曰吳王諸侯是以敢辭君若無卑天子以干其不祥而曰吳公孤敢不順從君命長弟吳子許諾辭尊稱居卑稱乃退而會吳先畝晉侯亞之吳遂以伯君子以是進吳子也何以先晉侯不使吳子得主中國也葉子

曰吳楚皆習夷狄者也吳晚見春秋抑之常甚於  
 楚楚屢會中國以長諸侯皆不免於貶雖莊王之  
 賢不得一以伯稱吳自季札之聘柏舉之戰僅得  
 以爵見然與中國會未嘗不殊惟一見於戚者下  
 與鄆人齒而已今夫差胡為遽許之以伯哉蓋莊  
 王之會欲以強奪諸侯而陵晉夫差之會欲以禮  
 尊天子而責晉從莊王之義則夷狄必至有中國  
 從夫差之義則夷狄必能尊中國此其所以異也  
 夫差之志雖未必然而春秋之義蓋以其道不以  
 其人故曰苟以是心至斯受之而已矣

楚公子申帥師伐陳

公子申楚大夫之三命者也

於越入吳秋公至自會晉魏曼多帥師侵衛葬許元  
 公九月螽冬十有一月有星孛于東方

記異也何以不言次日見也

盜殺陳夏區夫

夏區夫陳大夫之三命者也


十有二月螽

十有四年春西狩獲麟

西國之西也孰狩之公也何以不言地不使麟得  
 為地有也何以不言公不使麟得為公獲也公狩  
 而叔孫氏之車子鉏商獲麟以為不祥以賜虞人

孔子觀之曰麟也然後取之於是感而作春秋何感焉麟仁獸也有王者則至無王者則不至麟不至而狩獲之子曰吾道窮矣此春秋所以感麟也故以是始亦以是終葉子曰春秋以獲麟為終始吾既言之矣四靈王者之物也然易以乾言聖人之進退而六爻皆取象於龍其在初六曰潛龍勿用楚狂接輿比孔子於鳳而歌曰鳳兮鳳兮何德之衰也是四物者皆聖人以為類則麟非孔子以自說者歟龍非時而隱謂之潛鳳非時而出謂之衰則麟非王者不見而人獲之固麟德之衰也孔子伐木於宋削跡於衛窮於商周阨於陳蔡其亦

出非其時而人以為不祥者歟道之廢興君子之用舍天也孔子蓋自任之矣故曰文王既沒文不在茲乎又曰如有用我者吾其為東周乎然求之天下而卒不得則天宜無意於斯也是以不復夢見周公則知其衰鳳鳥不至則知其已及顏淵死曰天喪予子路死曰天祝予此麟之獲所以為吾道之窮也春秋有闕一時而不書者矣有闕二時而不書者矣此責之於時君者也未有闕三時而不書者焉獲麟而闕三時不書其意若曰春秋吾以無王而著一王之法者也天下之所宗者王也王之所承者天也王者既不作則所謂承天者終



三百六十二  
何以見乎此其所以獨以春首時而不書王正月  
一見獲麟而闕其三時非明王者之事而盡天人  
之道者未足與言也  
閔召

石林先生春秋傳卷第二十

後學 成德 校訂

先祖左丞著春秋讞攷傳三書自序云自其讞推  
之知吾之改正為不妄也而後可以觀吾攷自其  
攷推之知吾之所擇為不誣也而後可以觀吾傳  
是以併刊三書於南劍郡齋開禧乙丑歲九月一


日孫朝散郎權發遣劍南州軍州兼管內勸農事

筠 謹書

校勘鄉貢進士方 應

右春秋讞攷傳三書石林先生葉公之所作也自  
熙寧用事之臣倡為新經之說既天下學士大夫  
以談春秋為諱有年矣是書作於絕學之餘所以  
闢邪說黜異端章明天理遏止人欲其有補於世  
教為不淺也公之間孫來守延平出是書鋟木而  
傳之蓋有意於淑斯人如此學者其勉旃開禧乙  
丑九月一日校勘文林郎南劍州軍州判官真

德秀 謹書



Faint vertical columns of text in seal script, likely bleed-through from the reverse side of the page.

The left page is mostly blank with some faint, illegible markings and signs of aging.

